

# ليلة حمراء

رواية

دينا عماد



# ليلة حواء

دينا عماد

ليلة حمرا

# ليلة حمرا

رواية

دينا عماد

دخل وليد مكتب محاماة  
وقف لحظات امام مكتب السكرتيرة الخالي  
تجاهل المكتب... واتجه لمكتب زياد  
وجد باب المكتب مغلق وسمع اصوات مختلفة منها  
صوت زياد  
فهم انه بصحبته موكلين...رجع مرة اخرى لحجرة  
الانتظار

جلس على مكتب السكرتيرة  
فتح الدرج... امسك سماعات موبايل كانت بداخله  
قلبها بين يديه وهو يبيتسم

سمع صوت باب المكتب يُفتح  
وزياد يخرج ومعه موكلينه... اوصلهم حتى الباب  
الخارجي متجاهلا وجود وليد

بعد خروجهم عاد لوليد وجلس امامه  
"ايه الاخبار"  
"مفيش جديد... معندكش انت اخبار"  
"لا معنديش... اتصلت بباباها امبارح وقتلته خليها ترجع  
الشغل وان الشغل مالوش دعوة رفض"  
"انا مش عارف ابوها ده ايه... واحد داخل له من الباب  
يرفض ليه"

صمت زياد استياء من الموقف ككل... واردف قائلا  
"بص يا وليد... انا مش عارف هو بيفكر ازاي .. ومش  
مقتنع بسبب الرفض بس ارجع واقولك حاول تكلمه  
تاني"

"انا كلمته مرة واتنين...مصمم ان علشان قتلته بحب  
هاجر يبقى كان فيه بيننا حاجة ومشينا مع بعض وهو  
مش ممكن يوافق على كده ...غبي"  
لحظات صمت ثقيلة قطعها وقوف وليد  
"روح يا زياد شوف شغلك وهروح اقعد عند هانى شوية  
وابقى تعالى لما تخلص"  
قام زياد وربت على كتفيه قبل ان يغادر  
"متقلقش يا وليد...انا هروح لباباها بكرة البيت واحاول  
معاه تانى وربنا يقدم اللي فيه الخير"

فى غرفة هاجر  
هاجر تبكى والغرفة مظلمة  
يُفتح باب غرفتها... تدخل والدتها  
"هاجر... انتى صاحية؟"  
تضى نور الغرفة... ترى دموع هاجر التى لم تجف  
"انتى لسه بتعيطى"  
تكمل هاجر بكائها ولا ترد... تستطرد والدتها  
"وبعدين معاكى... مكنش عريس واترفض"  
"مش اى عريس يا ماما... ده الوحيد اللى حبيته"  
"اهو حبيتيه دى اللى خلت ابوكى يعاند ويرفضه"  
"ياستى والله كل شكوك بابا دى غلط... مفيش بيننا اى  
حاجة اكثر من الحب وبعدين اهو جه واتقدم ببقى فين  
المشكلة"  
"اهو تفكير ابوكى اعمل ايه"  
"كلميه علشان خاطرى"  
"كلمته يا بنتى والله انا يعنى عايزة ايه م الدنيا غير انى  
افرح بيكى"  
"كلميه تانى... وتالت... قوليله لو موافقش على وليد مش  
هتجوز حد تانى"  
"اه اقوله كده علشان يشك فيكى اكثر واكثر"  
تصرخ هاجر  
"اعمل ايه ياربى... هموت ومحدث حاسس بيا"  
تتاثر والدتها لحالتها وهى تبكى... وفى نفس الوقت  
تخشى ان يسمع زوجها  
"بس يا هاجر... بس يابنتى ابوكى يسمعك ويعكنن علينا  
زيادة"

"يعكزن ايه اكثر من كده... الشغل ومنعنى اروحه... اللى  
حبه ورفض انه يخطبنى... فيه ايه اكثر من كده"  
"طب قومي كلى لقمة هتقعى من طولك من قلة الاكل"  
"اكل ايه ياماما... ما اقع ولا اروح ف داهية"  
"تقى من بؤك... هقوم اجيبلك كوباية لبن"  
"مش شاربة"  
"لو شربتى واكلتى لقمة صغيرة هتكلم مع ابوكى تانى  
واحاول معاه"  
"احلفى"  
"والله"  
مسحت هاجر دموعها وحاولت ان تبتسم  
"طيب هاكل... بس بالله عليكى ياماما تحاولى تقنعيه  
مش تقوليئه واول ما يقولك لأ تسكتى"  
"حاضر... هقوم اجيبلك تاكلى"

دخل وليد مقهى الانترنت الذى يملكه صديقه هانى  
المكان واسع... واجهزة الكمبيوتر بعيدة كل منها عن  
الآخر  
من يدخل فى الممر الطويل حتى المكتب لا يرى شاشات  
الكمبيوتر  
الكراسى مصطفة ظهرها للحائط وبالتالي الشاشات  
متجهه للحائط  
الاضاءة خفيفة جدا... عبارة عن مصابيح صغيرة ملونة  
جلس وليد بجوار هانى على مكتبه... اخذ سيجارة من  
علبة سجائر الاخير  
"ايه يا عم الناس تدخل تسلم الاول مش تدخل هجم ع  
السجاير"  
"سلامو عليكو يا سيدى"  
"وعليكم السلام... اهلا وسهلا تشرفنا... حضرتك وشك  
ده ولا مركب وش جبس"  
"انت هنتريق"  
"مكبر الموضوع اوى يعنى... واحدة عايز تخطبها  
وابوها رفض... فكك وعيش حياتك بلا جواز بلا وجع  
دماغ"  
"انا كنت راضى بوجع الدماغ... بس شكلى لازم اسلم  
بالامر الواقع واحاول انساها"  
"تصدق انت كده صح... طيب بص"  
نهض هانى وهو يسحب وليد من يده  
وعلى اقرب جهاز كمبيوتر... اجلسه وهو يفتح احد  
المواقع الاباحية



"بص يا معلم... السيجارة اللي ف ايدك دى هتعلی  
الدماغ ع الاخر... والمز ز اللی هنا هتنتسك الجواز  
واللی عایزین یتجوزوا... عییبش یا معلم"  
ابتسم ولید وهو یسحب نفسا عمیقا من السیجارة  
"تصدق شکلها جامدة... هی فیها ایه"  
"لیک اکل ولا بحلقة... اشرب وانت ساکت ولو عایز  
تانی موجود... یالا ای خدمة"

---

فی منزل هاجر... جلست والدتها بجانب زوجها  
الاب "اکلت؟"  
الام "مکلتش غیر لما قتلها انی هتکلم معاک تانی"  
الاب "وبعدین بقی"  
الام "اسمع بس... انت منشف دماغک لیه... یعجبک یعنی  
لو البت جر الها حاجة من قهرتها کده"  
الاب "وانتی عایزانی اوافق علی واحد استغفلتنی ومشت  
معاه"  
"مین قال کده... دى بتحلف ایمانات انها معملتش ای  
حاجة غلط"  
"علی مین یا ولیة... او مال حبوا بعض ازای باللاسکی"  
"ماهی قالت وهو قالک انه صاحب المحامی اللی بتشتغل  
عنده یعنی شافها وشافته هناك... امانة علیک ماتکسر  
بخاطرها... انت مش عاجبک الجدع ف حاجة"  
"مسألتنس علیه"  
"طیب ما تسأل... ولو طلع کویس ببقی خیر"

"مش بالعهما الحكاية دى"  
"لا اله الا الله... يعنى انت فاكتر البت هيتقدم لها واحد  
ولا عمره شافها... ماتشوف الزمن اللى بقينا فيه واحمد  
ربنا على اخلاق بنتك"  
صمت والد هاجر... ادركت الزوجة ان زوجها  
يفكر... فقررت ان تطرق الحديد وهو ساخن  
"هااا قلت ايه... اقوم افرحها"  
نهض والد هاجر من مكانه... ورد على زوجته  
"سيبيني اقلبها ف دماغى شوية... انا داخل انام"

---

بعد منتصف الليل بدقائق قليلة... وصل زياد لمقهى  
الانترنت حيث تواعد مع وليد منذ ساعات  
رأى وليد يجلس على احد الاجهزة... ويضع السماعات  
فى اذنيه ويبدو انه يتحدث لشخص ما  
لوح له بيده واتجه لهانى... صافحه وجلس بجواره  
"ازيك ياهانى... ايه الاخبار"  
"تمام الحمدلله... صاحبك شكله هيفك اهو"  
"ياريت... والله صعبان عليا الاتنين"  
"ياعم هانى هو فيه احلى من الحرية"  
"لما تحب هتغير رأيك"  
"انا كده مرتاح بلا حب بلا وجع قلب.. خد سيجارة"  
مد هانى يده بعلبة السجائر لزياد... سحب زياد سيجارة  
اشعلها له هانى

بعد ان نفت دخانها...سعل كثيرا  
"يخربيتك ياهانى...السيجارة دى فيها ايه؟"  
"ايه يا زياد انت بقيت خرع كده ليه...الله يرحم ايام  
ثانوى"  
شرع زياد ان يطفئ السيجارة...اخذاها منه هانى بسرعة  
"ايبيبييه... انت هتكفر بالنعمة...هات ياعم"  
نظر زياد لوليد...لوح له بيده باشارة تساول عما لديه من  
وقت فى حديثه  
رد وليد اشارته بأنه لم ينتهى من حديثه بعد  
نهض زياد...فسأله هانى  
"ايه رايح فين"  
"هروح...عايز انام ورايا محكمة الصبح"  
"بدرى كده...ادى الجواز وسنينه"  
"سلام ياهانى"  
غادر زياد بعد ان اشار لوليد المنهمك فى الحديث بأنه  
مغادر على وعد باتصال تليفونى لاحقا

---

قبل الفجر قليلا... اغلق وليد محادثته وهو يتشاءب  
نهض مترنحا واقترب من هانى  
"انا ماشى"  
"ماتخليك قاعد"  
"انا مش عارف هقوم اروح الشغل ازاي... هروح الحق  
انام لى ساعتين"  
"مش تحكى لى كنت بتكلم مين كل ده"

وابتسم هانى ابتسامة ذات مغزى  
"شكلها غمزت يا معلم...مزة صح؟"  
ضحك وليد بغرور  
"صح"  
"احكيلى طيب"  
"بكرة بكرة... انا خلاص هنام وانا واقف"  
"طيب طمنى... نت بس ولا تليفون ولا ايه"  
"هههه صاحبك مش بتاع الكلام ده... هنتفق بكرة على  
معاد"  
"كداب... يا تلاقىها نصابة"  
"وهكذب عليك ليه بس... اما موضوع نصابة مفكرش  
هى هتاخذ كارت شحن الاول تضمن انى جد وباقى  
الفلوس لما نتقابل... يعنى لو نصب هتيجى ف حاجة  
بسيطة... ولو جد يبقى لقينا حنة طرية تطرى علينا  
الارف اللى احنا فيه ده"  
"يا معلم يا معلم... انا قلت الادب والاخلاق اللى نزل  
عليك فجأة الفترة اللى فانتت دى مش لايق عليك"  
"مكنش ادب ولا اخلاق... انا كنت مش شايف قدامى  
غير اللى بحبها... وراحت اللى بحبها يبقى اعيش انا  
بقى زى ما انا عايز... كفاية رغى انا هنام هنا... سلام"

عصر اليوم التالي... استيقظت ساندى من نومها  
فتاة فى بداية العشرينات... ممشوقة القوام... بيضاء  
البشرة... سوداء الشعر... حوراء العينين  
حجرة نومها واسعة جدا ومفروشة على طراز حديث  
دخلت الحمام الملحق بالغرفة... اخذت حماما باردا  
ثم خرجت وارتدت "هوت شورت وبادى"  
جلست امام مرآتها... جففت شعرها وشففته "ديل  
حصان"  
ووضعت بعضا من مساحيق التجميل المناسبة لوجودها  
فى المنزل

شقة ساندى... تأخذ شكل المستطيل  
يقسمها من المنتصف ردهة طويلة تقسم الشقة نصفين  
متقابلين  
النصف الذى يطل على المنور... يضم غرفة المعيشة  
وحجرة نوم اضافية والحمام والمطبخ فى اخره قرب  
باب المنزل

اما النصف الاخر والذى يطل على الشارع  
فيحتوى على غرفة النوم الرئيسية والصالون والسفرة  
تجمعهم شرفة واحدة

كعادة ساندى يوميا بعد ان اهتمت بمظهرها... قامت  
لتفتح شبابيك البيت جميعها... ودخلت المطبخ لتعد كوبا  
من النسكافيه

ثم فتحت مجمد الثلجة لتختار اى وجبة سريعة ستعدها  
اليوم  
بعد ان انهت اعداد كوب النسكافيه... وجدت جارتها  
الارملة الخمسينية فى الشقة المقابلة..والتى يفصلهما  
عن بعضهما البعض...المنور فقط  
تتلاصص عليها من خلف شباكها...ابتسمت وعلقت فى  
نفسها

"مش هتبطل ابدا تنفرج عليا ليل ونهار"  
سمعت جرس الباب يرن... ذهبت لتفتح... وجدت كشاف  
الغاز خارجا من شقة جارتها  
"كشفت ووصل الغاز يامدام"  
تحت جانبا  
"اتفضل"

دخل كشاف الغاز المطبخ...لاحظت ساندى نظراته  
المختلسة لها وهو يتصبب عرقا... وقفت ثابتة بعد ان  
شبكت يديها منتظرة ان ينجز مهمته فى قراءة العداد  
بعد ان انتهى... اقترب منها وهو يناولها الايصال  
وعندما وجدته يقترب منها اكثر من اللازم  
اوقفته بيديها

"عندك يا بابا... معنديش حاجة ببلاش"  
زاد ارتباك محصل الغاز وناولها الايصال بيد مرتعشة  
وخرج مسرعا ووقف خارج الباب حتى اعطته المال  
المطلوب واغلقت الباب خلفه

دخلت المطبخ لتأخذ كوب النسكافيه... وذهبت لتجلس فى  
غرفة المعيشة... وجدت جارتها تتلصص عليها من  
الغرفة المقابلة  
فأشارت لها بيديها وهى تبتسم بجرأة ولا مبالاة ما يعنى  
انه ليس لديه مال  
فأغلقت الجارة الشباك بشدة فى وجهها وهى تتمتم  
"قلة ادب"

---

عاد وليد من عمله.... مرهق للغاية لقلة نومه فى الليلة  
الماضية  
استقبلته والدته "حمدالله ع السلامة... اجهزلك الغدا"  
"لا ياماما انا داخل انام"  
"يا ابنى متعملش ف نفسك كده... لو عايزنى اروح  
لاهلها اكلهم هروح"  
"لا يا ماما متتعبيش نفسك علشان محدش يحررك... انا  
خلاص هحاول انساهها.. واكيد هى مش اول ولا اخر  
واحدة فى الدنيا"  
اتجه وليد لغرفته بعد ان انهى حديثه مع والدته... بينما  
كانت والدته تنظر له بقلب ينفطر لحاله  
بدل وليد ملابسه... وألقى بنفسه على السرير  
فى نفس اللحظة التى رن فيها موبايله... رد  
"الو... ازيك يازياد"  
"الحمدلله انت ايه اخبارك"

"الحمد لله... لسه راجع م الشغل وهنام شوية وابقى اعدى عليك بالليل"

"طيب انا كنت عايز اقولك انى اتصلت بالحاج جمعة واتققت معاه انى عايز اقعد اتكلم معاه... المهم قالى ارواح لهم البيت النهاردة"

"وبعدين"

"كل خير ان شاءالله"

"خايف اتعلق بأمل يا زياد"

"استبشر خير"

"خير ان شاءالله... بس هتقوله ايه"

"هقوله ان رفضه ده مالوش اى داعى وربنا يقدرنى على اقناعه"

"طيب انت حسيت ايه من كلامه؟"

"بص يا وليد... المرة اللي فاتت لما كلمته كان بيتكلم برفض قاطع المرة دى كان بيماين شوية... يمكن بيفكر"

"هتروح لهم امتى؟"

"انا عندي معاد فى المكتب الساعة ٩ هخلصه واقفل وارواح لهم... انا قلت له نتقابل بره علشان لو اتاخرت فى المكتب هو اللي صمم نتقابل فى البيت"

"بره ولا فى البيت المهم اول ما تخلص المقابلة دى تكلمنى ضرورى"



"من غير ما تقول... خلى بس الحاجة تدعى من قلبها ان  
ربنا يسهل واعرف اقنعه"  
"والله هي بتدعى من غير حاجة"  
"ماشى يا وليد... على مكاملة بالليل... سلام"  
"سلام"  
انهى وليد المكاملة... وألقى بنفسه على السرير ومن شدة  
اجهاده نام فوراً

---

وقفت الجارة كعادتها لتسلية وقتها تراقب ساندى  
ساندى تجلس فى غرفة المعيشة ممددة على الاركة  
تقلب بين قنوات التليفزيون حتى استقرت على قناة من  
قنوات الاغاني  
اخذت اللاب توب من جانبها... واشعلت سيجارة  
بدأت تصفح الرسائل المرسلة لها على بريدها  
الالكتروبى وحساب الفيس بوك  
تجاهلت كل الرسائل ذات المضمون الواحد والتي تعبر  
عن الاعجاب بها  
استعادت محادثة الامس مع وليد... وبدأت تقرأ بدايتها  
قبل ان تكتمل المحادثة بالصوت والصورة

ابتسمت وهى تتذكر حديثهما الذى تنوع ما بين احاديث  
عامة وخاصة  
الاحاديث الخاصة لم تطرق لحياتهما الشخصية ولكن  
لحديث ليلية خاص بين رجل وامرأة

ترددت وهى تنظر لرقمه المكتوب قبل انهاء محادثتهم  
حسمت ترددها وامسكت تليفونها واتصلت بوليد

رن تليفون وليد بجانبه وهو نائم... وبنصف عين  
مغضضة نظر فى الساعة فأدرك انه نام اكثر من ساعتين  
رد على الرقم غير المسجل  
"الو"

سمع صوت لم يميزه... صوت ناعم رقيق  
"انا صحبتك ولا ايه"

"مفيش مشكلة... مين معايا"

"بسرة كده نسيت صوتى"

اعتدل فى جلسته وبدأ يفيق

"احنا اتكلمنا قبل كده"

"ع التليفون لأ"

"معقول تكونى انتى؟"

"انا مين؟"

وبتردد اجابها

"ساندى"

ضحكت ساندى

"هى بعينها"

"مش مصدق انك بتكلمينى"

"اليه يعنى... مش احنا اتفقنا اننا هنتكلم تانى وهنتقابل  
اكيد"

"بصراحة كنت شاكك"

"مكنتش مصدقتى"

"كنت شاكك... لا مصدقك ولا مكذبك"

"مش انا قلتلك اللي فيها واللى عايز يقابلنى بيعمل ايه"

"بس قوليلى... انتى حلوة بجد زى صورك اللي

بعتيهاالى"

"تعالى عاين بنفسك"

"بكرة ماشى؟"

"لا انا بكرة مش فاضية لحد ٣ ايام كمان"

"طيب امتى؟"

"اى وقت بعدهم"

وصممت لحظات واكملت

"او قبلهم"

سألها لمزيد من التأكيد

"النهاردة"

"لو فاضى ومعاك فلوس"

"ماشى امتى وفين؟"

"اشحن لى ب ٥ جنيه الاول وبعد ما يوصلوا هتصل

بيك اقولك العنوان..وتجيب معاك ٢٠٠ جنيه"

"ماشى"

"على فكرة... انا باخد اكثر من كده بس علشان انت

عجبتتى عملت معاك واجب"

"متشكرين يا ستى ع الواجب"

"ياللا اسيبك انا تقوم وتفوق وتاخذ دش كده استعدادا  
لمقابلتنا الليلة...باى يا بيبى"  
"باى يا روح بيبك"  
انهى وليد مكالمته مع ساندى وهو يضحك ويعلق  
بصوت هامس  
"ايوه كده شكلنا هنرجع لايام الشقاوة والدلع"

---

وصل زياد منزل هاجر... واستقبله والدها بترحاب وود  
"انا اسف يا حاج جمعة ان الوقت اتأخر"  
"لا ابدًا متأخرش ولا حاجة احنا يدوب الساعة ١٠...هو  
فيه حد بينام بدرى اليومين دول... الشاى يا ام هاجر"  
"لا مالوش لزوم انا ماشى على طول"  
"يا استاذ انت منورنا"  
"ربنا يخليك... طيب انا مش هطول على  
حضرتك... اكيد عارف انا جاى ليه"  
"يعنى بتوقع"  
"هما موضوعين مالهمش تالت...الاولانى والاهم  
وليد...ممكن اعرف معترض عليه ليه"  
"انت عندك عيال؟"  
"مراتى حامل"  
"لما تخلف بنت هتحس بايه لما تعرف انها على علاقة  
بواحد من وراك ومستغفلاك ومش عاملة لك قيمة  
واعتبار بعد ما ربيتها وشقيت عليها...ها احساسك ايه"

"يا حاج جمعة انت فاهم الموضوع غلط... مفيش اى علاقة غلط بينهم ابدا وهاجر بنتك ميتخافش عليها دى ادب واخلاق يا زين ما ربيت... كل الموضوع انهم شافوا بعض عندى فى المكتب ولما حصل الوفق بتاع ربنا الراجل جه البيت من بابيه... غلط فى ايه؟"  
"اومال ايه حكاية بيحبوا بعض دى"  
"مشاعر مش اكثر... ربنا ولف قلوبهم على بعض... نساعدهم ان ربنا يجمعهم فى الحلال ولا نقف فى طريقهم ويا عالم ممكن يحصل ايه... وزى ما قال الرسول عليه الصلاة والسلام"  
"عليه الصلاة والسلام"  
"اذا اتاكم من ترضون دينه وخلقه فزوجوه"

سكت جمعة يفكر فيما يسمعه  
بينما وقفت هاجر تسترق السمع من مكان قريب وهى تدعو الله ان يستطيع زياد اقناع والدها

دخلت والدة هاجر بالشاى... وقدمته لزياد وجلست معهم الام "اتفضل يا استاذ... منور والله"  
زياد "شكرا يا حاجة... احضرينا وقولى حاجة"  
ردت الام وهى تنتظر لزوجها  
"قلت كثير ربنا اللى عالم... ها ياجمعة قلت ايه؟"  
جمعة "مقلتليش يا استاذ ايه الموضوع التانى"  
زياد "الشغل... انا مش عارف اشتغل من غير هاجر بصراحة"

جمعة"ماهو مينفعش تروح الشغل وانا عارف انها  
هتشوفه هناك"

زياد"ماهو بس لو حضرتك وافقت هتبقى اسعدت

ثلاثة... وليد وهاجر وانا شغلى هيمشى"

قالها زياد بمرح... ابتسم بعدها جمعة

زياد"هااا يا حاج..قلت ايه...هتكسفى فى طلبى"

الام"امانة عليك ماتكسر بخاطرهم"

جمعة"خليه بيحى هو واهله وبعدين لما اسأل عليه لو

لقيته كويس يبقى يتخطبوا وبعدها هاجر تنزل الشغل"

كادت هاجر ان تصرخ فرحا عندما سمعت اخر جملة

ولكنها خافت ان يغير والدها رايه فأثرت الصمت

---

وليد واقف امام مرآة الحمام يحلق ذقنه وهو يدندن

بأغاني شعبية

انهى حمامه... خرج ليختار ملابسه... انتقى قميص

وبنطلون بعد حيرة وتبديل اكثر من مرة... ارتدى ما

استقر عليه اخيرا

وقف امام المرآة وصفف شعره ووضع بعض قطرات

من عطره الاصلى الذى يستخدمه فى المناسبات الهامة

فقط

دخلت والدته  
"ايه الشياكة دى انت رايح فين؟"  
"رايح فرح واحد صاحبي"  
"مين؟"  
"لا متعرفيهوش"  
"هنتأخر زى امبارح"  
"احتمال...متقلقش ياماما ابقى نامى انتى"  
خرج وليد من حجرته... ووالدته خلفه حتى اوصلته  
للبياب

وليد فى طريقه... ذهب لهانى والقى عليه التحية من  
الخارج  
هم هانى واقفا وخرج لملاقاته عند البياب  
"ايه ده...انت رايح فين"  
"المزة بتاعة امبارح كلمتنى"  
"لا ياراجل"  
"اه والله"  
"وانت رايح لها... بسرعة كده"  
"عينك هترشق فى ام الليلة"  
"سهلووو يا عم... امبارح ليلة زرقا والنهاردة ليلة  
حمرا"  
"بكلامك ده ياخوفى الاقى نفسى ف ليلة سودة"  
"لا هتبقى ليلة زى الفل اكيد...بس عدى عليا وانت جاى  
علشان تحكى لى"  
"ماشى...يا لا سلام"

هاجر جالسة مع والدها... علامات السعادة على وجهها  
يتحدثون ثلاثتهم احاديث مختلفة... وضحكات هاجر  
تملأ البيت سعادة... لاحظها والدها وسعد بداخله لسعادة  
ابنته

الاب "بقولكم ايه... هاجر بقالها كتير مكلتش... هنزل  
اجيلكم عشا من بره... عايزة ايه يا هاجر اجيبهواك؟"  
هاجر "عايزة بيتزا"  
جمعة "حاضر"

نهضت هاجر من مكانها بسرعة واحتضنت والدها  
"شكرا يا بابا... ربنا يخليك ليا... انا بحبك اوى"  
قبلها والدها من جبينها  
"انا مليش الا سعادتك يا بنتى.. بس انا لسه موافقتش  
نهائى الا بعد ما اسأل عليه"  
"انا واثقة انك لما هتسأل عليه هتوافق"  
"اتمنى"

---

وكما اتفق وليد مع ساندى... ارسل لها رصيد ثم اتصل  
بها واعطته عنوانها ورقم الشقة فى الدور الاخير فى  
البناية التى تسكنها

يصعد وليد السلم بتردد وقلق من ان يسأله اى شخص  
عن وجهته  
يصل للدور الاخير ويقرأ رقم الشقة المكتوب على الباب  
ليتأكد قبل ان يدق جرس الباب



رن الجرس مرة... فثانية... فثالثة دون رد  
تناهى الى مسامعه صوت التلفزيون العالى  
استاء من تجاهله... حدث نفسه  
"يمكن مش سامعه من صوت التلفزيون"  
اتصل بها... التلفون یرن دون رد... عاود الاتصال  
وتكرر عدم الرد  
شعر بالضيق وهو يعلق  
"يابنت النصابة"  
ابتعد قليلا عن باب الشقة... ونظر من شباك المنور  
... وجد شبابيك شقتها مفتوحة والانوار مضاءة  
نظر خلفه... وجد السلم المؤدى للسطح... اراد ان يتأكد  
انها بالداخل وتتجاهله  
صعد درجات السلم المؤدية للسطح... وجد باب السطح  
مفتوحا  
دخل السطح... وقف فى الجهة المقابلة لشقة ساندى  
ليستطيع ان يراقب داخل الشقة من الشبابيك المفتوحة  
نظر نظرة عابرة للمطبخ... والحمام... وبتفحص فى  
غرفة النوم الصغيرة... وعندما ركز نظره فى غرفة  
المعيشة  
صدم من هول ما رأى ولم يتمالك نفسه ورجع خطوات  
للوراء  
اعتقد ان ما يراه غير حقيقى... اقترب من سور السطح  
مرة اخرى ليتأكد مما يراه

وجد ساندى ملقاة على ارض غرفة المعيشة... مذبوحة  
من رقبتها ... غارقة فى دمائها

اراد ان يبتعد بأقصى سرعة... نزل السلم سريعا  
عبر بجانب باب شقتها وهو يتجنب النظر من شدة  
الخوف

قبل ان يصل للدور قبل الاخير... ومن شدة  
سرعته... اصطدم بالجارة المتلصصة... تألمت  
"أى... ايه يابنى ده"  
لم يرد عليها واكمل هروب من المكان بأقصى سرعة

عندما وصل للشارع حاول ان يضبط سرعة خطواته  
صورة ساندى المذبوحة لا تفارقه... تخيفه  
ظل يتحدث طول الطريق  
"مين اللى قتلها... حبكت فى الوقت اللى انا جاى فيه...  
ياخوفى لاتورط فيها... رقىمى اللى متصل بيها... والست  
اللى شافتنى... يادى المصيبة... انا ضعت  
خلاص... يارب استرها معايا... متعاقبينش على نيتى  
واللى كنت جاى اعمله... انت عالم يارب انى برى...  
اعمل ايه واتصرف ازاي علشان اخرج من المصيبة  
دى"

رن تليفونه... انتفض فزعا لاول وهلة  
بدأ يتماسك عندما ادرك انه مجرد اتصال  
نظر فى الاسم... وجد زياد... تذكر انهما على وعد  
بالاتصال

وبصوت لا يخلو من رجفة  
"الو"

"ايوه يا عريس مبروك مقدما يا سيدى"

"مبروك!! على ايه؟"

"ابو هاجر قال تروح له انت والحاجة وتتكلما وربنا"

يقدم اللي فيه الخير"

"ان شاءالله"

وبتعجب... سأله زياد

"ايه مالك؟؟ انا توقعت هتفرح اكثر من كده"

"ايوه ما انا فرحان اكيد"

"مالك يا وليد... صوتك مش طبيعى"

"مفيش حاجة يا زياد انا بس ف الشارع"

"وايه يعنى ف الشارع... مالك بجد؟؟ فيه مشكلة؟"

"لا ابدأ... شفت بس حادثة فى الشارع فتلاقينى متأثر من"

المنظر بس"

"اااه... طيب طمنتنى... ابقى كلمه بقى ورتب معاه معاد"

ولو عايزنى اجى معاك قولى"

"ان شاءالله... ان شاءالله... سلام يا زياد"

وانهى وليد المكالمة بسرعة... وادرك انه ابتعد كثيرا

عن منزل ساندى... شعر بالتعب والارهاق والخوف معا

اتجه إلى اقرب رصيف وجلس... يلتقط انفاسه

هاجر مع والدتها فى منزلها... جلست ملتصقة بوالدتها  
مسندة رأسها على صدرها... احاطتها والدتها بذراعيها  
"ماما"

"نعم"

"تليفونى فىن"

"معرفش"

"يعنى متعرفيش باباه مخبيه فىن"

"مسألتنوش والله"

"طيب ممكن تدينى تليفونك اكلم وليد افرحه"

"يا بنتى اصبرى... واحدة واحدة وكل حاجة هتمشى"

كويس بس اسمعى الكلام"

"هو انا هعمل ايه... انا كل اللى طالباه كلمتين بس اظمن"

عليه واقوله ان بابا وافق وخلص... علشان خاطرى

وحياتى عندك يارب يخليكى ليا ماتقولىلى لأ"

سكنت والدتها لحظات... قبلتها هاجر فى وجنتها ويدها...

وكررت بتوسل

"علشان خاطرى"

تنهدت والدتها

"قومى خديه م الشاحن... بس كلمتين وبس"

كررت هاجر وهى تضحك الجملة الاذاعية الشهيرة

"كلمتين وبس"

هاجر ممسكة بتليفون والدتها... منتظرة رد وليد على

اتصالها

قلبا يخفق بشدة من شدة اشتياقها لسماع صوته

وليد فى المواصلات... سارحا مستندا بيديه على خده  
يفكر ما حدث له وما سيحدث  
رن التليفون... اخرجته من جيبه وهو اقل فزعا من  
الاتصال السابق  
عندما وجد رقم غير مسجل... ظل لحظات ينظر فى  
الرقم وينظر حوله بخوف... غير قادر على اتخاذ قرار  
الرد  
"ياترى مين... يكون كمين من البوليس"  
بمجرد تخمينه... ضغط زر الرفض... ثم زر غلق  
التليفون

فوجئت هاجر برفض الاتصال... اعادت الاتصال مرة  
اخرى... لكنها وجدت التليفون مغلق... ظلت تفكر  
"بيقفل التليفون ف وشى ليه... هو مبقاش عايزنى ولا  
ايه؟؟؟"  
نظرت للتليفون الذى بيدها... وعندما تذكرت انه ليس  
تليفونها  
رددت باطمئنان  
"الكيد ميعرفش ان انا... يمكن مش فاضى ولا فصل  
شحن"

وليد فى طريقه لمنزله... لم ينتبه انه بجوار محل هانى  
لاحظه هانى وهو جالسا بالداخل... قام مسرعا كان وليد  
تجاوزه  
نادى عليه... انتبه وليد على سماع اسمه... التفت لهانى  
وذهب إليه  
"ايه ياعم معدى كده ولا كان ليك صاحب"  
رد بصوت حزين وهو يهم بالمغادرة  
"معلش مكنتش اخد بالى"  
شده هانى من ذراعه  
"استنى هنا... فى ايه؟؟ انت متأخرتش يعنى؟؟ هي  
طلعت نصابه ولا ايه"  
سأله هانى وهو يضحك بصوت عالى... حدجه وليد  
بنظرة استهجان  
"متزعلش... بس انا قلت اكيد مش بالسهولة دى... تعالى  
تعالى روق والبنات غيرها كثير"  
"سببى ف حالى يا هانى انا ف مصيبة"  
وبنبرة جدية سأله هانى  
"مالك يا وليد؟؟ انت مش طبيعى.. مصيبة ايه؟؟"  
همس وليد بصوت مرتجف  
"البت ماتت"  
وبنبرة عالية من المفاجأة علق هانى  
"موتها؟؟ يخربيتك انت كنت آخذ ايه؟"  
"وطى صوتك... انا مخدتش حاجة ولا موت حد"  
"طيب تعالى ندخل نقعد وتحكى لى اللى حصل"

وبعد ما انهى وليد قص ما حدث بالتفصيل على هانى  
ساد صمت ثقيل بينهما... قطعه سؤال وليد  
"اعمل ايه دلوقتي... اهرب ولا اروح فين"  
"تهرب ليه... انت معملتش حاجة.. خليك عادى جدا...  
وبعدين مش يمكن تكون لسه عايشة"  
"عايشة ايه انا شايفها مدبوحة ودمها سايح... منظر بشع  
مبيروحش من قدامى"  
"طيب يمكن يمسكوا القاتل"  
"ياريت يبقى ربنا نجانى"  
"انت اخر مرة كلمتها امتى؟"  
"لما بعثتها الرصيد واتصلت بيا تدينى العنوان يعنى قول  
قبل ما ابقى عندها بنص ساعة او ساعة الاربع"  
"يعنى هى اتقتلت قبل ما تروح لها على طول خلال  
الساعة الاربع دى مثلا"  
"اكيد"  
"انت مشفتش القاتل"  
"لا"

وانتبه وليد للهجة الاسئلة والاجوبة فهب واقفا  
"انا ناقص يا هانى عاملى فيها وكيل نيابة"  
"مش بحاول اساعدك وبنفكر مع بعض"  
"مش عايز افكر... ياريتنى ما روحت... ياريتنى  
ماعرفتها... ياريتنى ما جيتلك امبارح اصلا كله بسبب  
الموقع الزفت والسيجارة الهباب اللى خلتنى ماشى ورا  
مزاجى زى الاهبل"

"جيبها فيا بقى... انا ضربتك على ايدك... كل واحد عقله  
ف راسه يعرف خلاصه"  
ردد وليد وهو يغادر المكان  
"ربنا يستر...ربنا يستر"

---

فى ظهيرة اليوم التالى...وليد فى عمله وامامه جميع  
الجراند الصباحية يبحث فيها عن خبر للجريمة ولم يجد  
نادى للساعى واعطاه نقود وطلب منه ان يشتري له  
جميع الجرائد المسائية  
متجاهلا الكثير من تعليقات زملاءه عن الثقافة التى  
ظهرت فجأة او عن ارتياهم فى كونه يضارب فى  
البورصة بأموال يخفيها عنهم او بحثه عن وظيفة فى  
الإعلانات المبوبة

ظل يتجاهل حديثهم وهو يمر بعينيه على كل عنوان بكل  
صفحة امامه  
قطع تركيزه اتصال من نفس الرقم الذى تجاهله بالامس  
ارتاب فى الاتصال ولكنه حدث نفسه  
"هو البوليس هيتصل ياخذ منى معاد الاول"  
رد على الاتصال... وسمع صوت هاجر  
"الو...وليد ازيك"  
"هاجر؟؟... ازيك انتى عاملة ايه"  
"الحمدلله... بابا وافق اخيرا يا وليد"  
"عرفت من زياد امبارح... انتى بتتكلمى منين"



"من تليفون ماما اتصلت بيك امبارح مردتش عليا"

"مسمعتوش معلش"

"انا افكرته فصل شحن"

"اه ما انا مسمعتوش وفصل شحن من الاتصال... انتى"

"اخبارك ايه... كويسة؟؟ وحشتينى اوى"

"انا كويسة الحمدلله... وانت وحشتنى اوى... هتيجى لبابا"

"امتى يا وليد... مقابلتك ليه هتفك حبستى دى... فى اسرع"

"وقت يا وليد"

"حاضر انا بس كنت محتاج ارتب امورى"

"ترتب ايه؟؟ هي مقابلة محتاج ترتب ايه؟"

"يعنى وقت علشان..."

"قاطعته" وقت علشان ايه... انا ماصدقت بابا يوافق يقابلك"

"وانت تقولى وقت"

"خلاص يهاجر... يعنى لو كلمته اجى بكرة"

"هيوافق... او النهاردة"

"ايوه... بس كلمه وانا من ناحيتى عملت اللى عليا"

"وزيادة... متصغرنيش قدامه"

"حاضر... هكلمه وف اقرب وقت اجيلكم... النهاردة او"

"بكرة حسب ما يقول"

"ماشى يا وليد... متقولوش انى كلمتك ولا اننا اتكلمنا"

"خالص من يوم ماسيبت المكتب"

"حاضر... حاجة تانية؟"

"لأ... هقفل انا دلوقتى واوعى تتصل على تليفون ماما"

"علشان بابا ساعات بيرد"

"حاضر... خلى بالك من نفسك واشوفك فى اقرب وقت"

"ان شاءالله... مع السلامة يا وليد"

فى نفس الليلة و عقب تحديد موعد مع والد هاجر بعدما  
طمئن و ليد نفسه ان الحادث بعيدا عنه تماما وان خوفه  
بلا مبرر

فقد يكون احدهم انقذها او ربما تم القبض على القاتل او  
ربما كان ما مر به كابوس غير حقيقى  
ذهب و ليد مع والدته و زياد لمقابلة والد هاجر  
والذى استقبلهم بترحاب و بعد حديث عام بين الاسرتين  
بدأت الدة و ليد الحديث الجاد

"يا حاج احنا جايين نخطب هاجر لوليد زى ما انت  
عارف... و و ليد وظيفته ثابتة و الشقة موجودة لو هاجر  
عايزة تغيير حاجة فيها براحتها انا هبقى ضيفة عندهم  
كل فترة و قبل الجواز هنقل هروح اعيش فى بيت اهلى  
فى البلد علشان اكون قريبة من بنتى الكبيرة اللى  
متجوزة هناك"

والدة هاجر "ده انتى على راسنا يا حاجة و هاجر بنتك  
برضه"

والدة و ليد "اه طبعا بس انا مش عايزة اكون ثقيلة على  
حد بيت اهلى فى البلد فاضى و مقبول و انا قاعدة هنا  
علشان و ليد مييقاش لوحده. انتى عارفة السن و محتاجة  
اللى يراعينى و بنتى هناك هتبقى بينى و بينها خطوتين  
تقدر تطل عليا اى وقت"

والد هاجر "احنا نتشرف بيكم يا حاجة بس ادينا وقت  
نسأل عليكم و انتم كمان تسألوا علينا"

زياد "يا حاج جمعة هما الجماعة من غير ما يسألوا  
جايين و عايزين يتشرفوا بنسب حضرتك... و و ليد

صاحبى من زمان من اعدادى واحنا مع بعض  
واضمنهولك برقبتي وانت عارف معزة هاجر عندى  
وانى يعتبرها زى اختى فيقول لو نقرا الفاتحة وبعد كده  
الترتيبات تبقى كلها واحدة واحدة بس علشان لو حبوا  
يتكلموا يتفقوا على اى حاجة فى الترتيبات تبقى بينهم  
علاقة رسمية"

صمت جمعة لحظات يفكر...نظر فيها لهاجر  
وجد نظرات التوسل بالموافقة وهى تمسك قلبها من شدة  
التوتر فى حركة لا ارادية يعلمها تماما كلما زاد توترها  
تحكمت مشاعره وحبه لابنته واجاب  
"على بركة الله...نقرا الفاتحة"

---

فى نفس الوقت... امام شقة ساندى  
يتجمع الكثير من سكان العمارة وسكان العمارات  
المجاورة الذى تناهى لمسامعهم خبر العثور على جثة  
مذبوحة

رجال الشرطة والنيابة تعالين مسرح الجريمة  
ساندى ملقاة على الارض مذبوحة فى غرفة المعيشة  
رجال البحث الجنائى يرفعون البصمات من جميع  
اجزاء المنزل

يتقدم احد العساكر لضابط المباحث ببطاقة رقم قومى  
"مراد باشا...لقينا البطاقة دى ف اوضة النوم"

يقرأها مراد بصوت مسموع  
"سنة على محمد سليمان... ٢٥ سنة... انسة... من  
العمرانية... وايه اللي جابها هنا مدينة نصر"  
بيحث مراد حوله يخرج قريبا من الباب ويتحدث  
بصوت عالي للجمع الموجود بالخارج  
"هو فين اللي بلغ؟؟"  
يقترب منه البواب بخطوات مرتجفة وبصوت متقطع  
"انا يا باشا"  
"هي القتيلة عايشة هنا لوحدها؟"  
"ايوه يا باشا... لسه مأجرة الشقة من ٣ شهور"  
"هي بتشتغل"  
ويتلثم رد البواب  
"ايه... لا... معرفش"  
نظر مراد حوله على مستوى الشقة وفرشها  
"هو ايجار الشقة هنا كام"  
"٥ الاف يابيه"  
"٥ الاف... ومش بتشتغل... امممم وبتجيبهم منين"  
صمت البواب... واكمل مراد اسئلته  
"ايه اللي خلاك تشك ان جرالها حاجة وتبلغ؟"  
"الست منيرة يا باشا"  
"مين الست منيرة"  
"جارتها ف نفس الدور... هي اللي قالتلى لازم نبلغ"  
"ناديلى الست منيرة من الناس الكثير اللي بره دول"  
تقترب منيرة وهي تتمم آيات قرانية وتتلفت حولها  
"ايه اللي خلاكى تشكى ان فيه حاجة"

"صدق الله العظيم.... التليفزيون يا باشا... التليفزيون  
من امبارح بالليل شغال ع العالى ومعرفتش انام منه  
ابدا... اصل انا بنام فى الاوضة اللي ف وش الليفنج  
بتاعها... وبعدين هى فى العادى بتصحا العصر وتفتح  
الشبابيك وتفضل رايحة جاية فى البيت... النهاردة  
الصبح صحيت اصل انا بصحى بدرى ما انا لما  
معرفتش انام من صوت التليفزيون روحت نمت فى  
الاوضة اللي ع الشارع... المهم لقيت الشبابيك مفتوحة  
والتليفزيون زى ما هو عالى والانوار كلها مفتوحة...  
ومشقتهاش خالص طول اليوم فاستغربت وقلت لعم  
غريب"

"وليه مخبطتيش عليها امبارح تقوليلها توطى  
التليفزيون"

"مفيش بينى وبينها كلام"  
"ليه؟"

"اصلها..."

وقطع حديثهما احد رجال البحث الجنائى وهو يحمل  
كيس بداخله موبايل يرن  
"تليفون القتيلة بيرن يا باشا"

تناول مراد الكيس الذى يحتوى على التليفون ... وامسكه  
بمذيل للحفاظ على البصمات للرد سريعا قبل ان ينغلق  
الخط

فتح الخط ولم يتكلم... وسمع على الطرف الاخر صوت  
رجل منفعل  
"انتى فين ياهانم ومجتيش ليه؟"

تكلم مراد  
"مين معايا؟"  
ثار الطرف الاخر  
"انت اللى مين؟؟ فين ساندى"  
"حضرتك مين"  
"انت مال اهلك يا حيوان... هي مجتش علشانك... تطلع  
مين بقى"  
اشتأط مراد غضبا وصرخ فى محدثه على الطرف  
الاخر  
"معاك مقدم مراد حسنين بحقق فى جريمة قتل سناء  
سليمان او ساندى على حسب انت تعرفها باى اسم...  
انطق انت مين"

أغلق الخط فورا فى وجه مراد... مما زاده غضبا  
اعاد الموبايل فى الكيس الخاص به وردد هامسا  
"وحياة امك لاهجيبك ف اسرع وقت"

كانت منيرة مازالت ترتجف امامه... بدأ يهدئ من  
غضبه  
"كلمى يا مدام... كنا بنقول ايه"  
ردت بتلعثم  
"ايه... اللهم صل على النبي... نسيت"  
ركز مراد تفكيره لحظات وسألها  
"كنتى بتقولى مفيش بينك وبينها كلام... ايه"  
"اصلها استغفر الله العظيم... ربنا يرحمها مطرح  
ماراحت كانت مش مظبوطة"

"مش مطبوعة ازای یعنی"  
"انا قلت وانت تفهم... انا مقولش اكثر من كده"  
"انا عايز اتأكد... تقصدى مش مطبوعة یعنی نصابه ...  
حرامية... مومس"  
قاطعته منيرة محرجة  
"استغفر الله العظيم ربنا يستر على ولايانا"  
"وانتى عرفتى منين؟"  
"زى ما قاتلك الشقة مكشوفة ودى رجاله داخله ورجاله  
خارجة ووشها كان مكشوف مكنتش بتكسف ابدا"  
تلفت مراد وهو ينظر للشقة مرة اخرى  
"كنت متوقع حاجة زى كده"  
والتفت لمنيرة مرة اخرى  
"طيب يا مدام... احتمال كبير احتاجلك تانى... شكرا  
تقدرى تتفضلى"  
ابتعدت منيرة خطوات بينما كان مراد يتجه ليتفقد بارقى  
ارجاء الشقة  
وقفت منيرة مترددة لحظات... وعادت مرة اخرى لمراد  
"بقولك ايه يا باشا"  
"نعم"  
"انا افكرت حاجة مش عارفة هتفيدك ولا لا"  
"قولى افكرتى ايه؟"  
"امبارح بالليل نزلت اشترى شوية حاجات... وانا  
راجعة لقيت واحد نزل يجرى وحتى خبطنى ف  
جريتة"  
انتبه مراد لاقوالها وسألها بتدقيق  
"مش يمكن نازل من اى شقة فى العمارة"

"لا ده اكيد نازل من عندها... انا وهى اخر دور وانا  
قابلته بين الدور بتاعنا والدور اللي تحتنا"  
"تقدرى توصفيه"  
"يعنى هو شاب كده بالكثير ٣٠ سنة يمكن اقل  
شوية... طويل واسمر بس مش اسمر اوى ومش فاكرة  
اكثر من كده"  
"طيب لو شفتيه تفتكره"  
"ايوه"  
"متشكر اوى اوى يا مدام... انا اكيد هحتاجك تانى ومش  
بعيد الحل يكون على ايدك"  
كان مراد يشكرها بابتسامة ودودة... جعلتها تخفف من  
حدة خوفها وتبتسم له فرحة بدورها فى مساعدة العدالة  
وتشكره وهى مغادرة الشقة... مسرح الجريمة  
شاور مراد للبواب ان يأتية... أناه مهرولا  
"نعمين يا باشا"  
"هى القتيلة كان بيذروها ناس كثير"  
"م م معرفش"  
"انت هتستعبط... ما باينة كانت بتشتغل ايه"  
رد وهو منكس الرأس  
"اه كان بيجيلها ناس كثير"  
"وسكان العمارة عادى... متضايقوش؟ مفكروش  
يطردوها مثلا"  
"يعنى بقالهم مدة قريبة بس اللي اخدوا بالهم وانا كنت  
بخرج نفسى بره الحكاية دى واقول انه مبيحصلش"  
"كانت كريمة معاك شكلها"



"يا باشا انا مليش دعوة بحاجة والختمة الشريفة"  
"ماشى... انت شفت حد جالها يوم الحادثة"  
"والله ما اعرف ولا اخدت بالى"  
"وفين اصحاب الشقة... سايبينها كده لواحدة توسخ  
سمعتهم"  
"اصحاب الشقة مسافرين وانا اللى بأجرها وبيعتلهم  
الايچار كل ٦ شهور"  
"اااااااه قتللى بقى... يعنى هى مأجرة الشقة دى منك  
انت وانت طبعا لما لقيت الحكاية مزهزة كده مقلتش  
لا"  
"متظلمنيش يا بيه ده انا اجرت لها الشقة علشان ينوبنى  
ثواب"  
"افهمها دى بقى... ينوبك ثواب ف ايه"  
"اصل ف ايلة كده برد ومطر من ٣ شهور لقيت  
مغاورى داخل عليا وبيقولى ان فيه واحدة مش لاقية  
حنة تبات فيها وانها لو لقت شقة هنراضينا كويس وهو  
عارف ان الشقة دى كانت فاضية فانا قلت واية وغلبانة  
واديهما الشقة"  
"مين مغاورى ده؟؟"  
"ده بواب صاحبى ماسك عمارة بعدنا بشارعين"  
"وهو يعرفها منين؟"

اقترب عسكري من مراد  
"مراد باشا... وكيل النيابة خلص معاينة وعايز  
حضرتك"  
نظر مراد فى ساعته... ثم تحدث لغريب

"بكرة الصبح تجيلي المديرية انت ومغورى"  
"حاضر ياباشا... امشى؟؟"  
"اه امشى"

واخرج مراد تليفونه من جيبه... واتصل باحد الارقام  
وبلهجة آمرة  
"ماجد... انت فين؟؟... طيب فضى لك نفسك خالص  
علشان عايزك تبقى معايا فى القضية دى... ساعة  
وتكون عندى فى المكتب... سلام"

---

فى مكتب مراد... يدخل ماجد  
"مساء الخير يا باشا"  
"مساء النور... تعالى اقعد"  
"خير... ايه القضية"

"بنت ليل اتدبحت فى شقتها امبارح واكتشفوا الجثة  
النهاردة... طبعا الجريمة واضح انها هيكون فيها مشتبه  
فيهم كتير لتعدد علاقاتها... جارتها شافت القاتل...  
وعلشان نوصل له هندور فى اكثر من اتجاه... اول  
حاجة فيه مكالمة جت وانا عايز اعرف مين ابن الكلب  
اللى اتصل ده واجيبه هنا واعرفه مقامه"  
"اشمعنى ده بالذات"  
"اهو ده بالذات وغيره طبعا لما تجيلى بيان المكالمات  
كله ونفحصه"  
"تمام فى اقرب وقت"

"عايزين كمان نعرف اهلها ونشوف رد فعلهم ايه ...  
يمكن تكون جريمة شرف"  
"ممکن نبعث اى عسكرى يستدعى اهلها"  
"لا مش دلوقتى وبقولك عايز اشوف رد الفعل بنفسى"  
"امتى سعادتك"  
"بكرة ... انا م الصبح تعبان هروح انام واعدى على بيت  
اهلها الصبح... عايز بيان المكالمات يكون موجود على  
مكتبى اول ما اجى"  
"علم وينفذ يا باشا"

---

فى صباح اليوم التالى... ولید فى عمله  
اشترى جميع الجرائد الصباحية كالیوم السابق  
ظل یقلب فیها... لم یجد اى خبر  
فى الظهيرة ارسل الساعى یشترى الجرائد المسائية  
بحث فیها وتوقع الا یجد شیئا  
حتى رأى خبر صغير فى احدى الجرائد  
"العثور على جثة فتاة لیل مذبوحة فى شقتها بمدينة  
نصر"

قرأ الخبر اكثر من مرة...  
"تلقی قسم مدينة نصر بلاغا من حارس عقار احدى  
البنایات بالشك فى حدوث مكروه لساكنة احدى الشقق...  
على الفور انتقلت قوة من القسم لمكان البلاغ حيث تم  
العثور على جثة لفتاة تدعى س. ع مذبوحة ... وقد تم

اخطار النيابة بالحادث وبالتحريات المبدئية تبين انها فتاة  
ليل ويجرى الان تحقيقات لكشف غموض الحادث"

هب وليد من مكانه فزعا... ترك عمله بدون استئذان  
ظل يهيم على وجهه فى الشوارع وهو يفكر كيف  
يتصرف  
يحاول ان يبدو طبيعيا فهو بالفعل برئ وليس له دخل  
بالقتل

ام يهرب قبل اتهامه بتهمة ليس له اى ذنب فيها  
ام يستسلم لقضاء الله سواء تم اكتشاف القاتل الحقيقى او  
تم القبض عليه

---

مراد توقف بسيارته امام العنوان الموجود فى بطاقة  
ساندى

وجدها عمارة متهالكة فى منطقة شعبية  
سأل احدى السيدات التى كانت خارجة من العمارة  
"لو سمحتى"

"نعم؟"

"هو على سليمان ساكن هنا"

"قطيعة"

"ايه؟"

"عايزه ف ايه؟"

"عايزه ف موضوع مهم لو سمحتى... هو فى العمارة  
هنا"

ردت وهى تنتظر لمراد بتعجب  
"ايوه... اول مرة حد نضيف يسأل عليه... اوضته فوق  
السطوح ... فوتك بعافية"  
تركته السيدة واكملت طريقها... سعد مراد السلم حتى  
توقف فى السطح  
وجد غرفتين احدهما مغلقة والاخرى مفتوحة يلعب  
امامها بعض الاطفال  
نادى مراد على اكبر الاطفال  
"بسسس... هو على سليمان فى انهى اوضة يا شاطر"  
رد الطفل ذو العشر سنوات  
"عم على فى الاوضة دى بس هو نزل من شوية"  
"وبيرجع امتى"  
"بالليل"  
"اومال فىن مراته وولاده"  
"عم على عايش لوحده"  
"طيب مفيش حد كبير هنا"  
"ابويا فى الشغل وامى فى السوق"  
انهى الطفل اجابته وذهب يكمل لعب مع اخوته  
نزل مراد بهدوء دون ان يسأل عن على سليمان حتى لا  
يفصح عن شخصيته... مقرر ان يعود مرة اخرى فى  
المساء

عاد مراد لمكتبه وجد غريب ومغاورى فى انتظاره  
امرهم بالدخول معا... وبدأ فى استجوابهم  
"فهمونى بقى واحدة واحدة كده ايه حكايتها"  
غريب"انا حكيت لسعادتك امبارح كل اللى اعرفه من  
يوم ماقالى عليها مغاورى"  
مراد"تعرفها منين يامغاورى؟"  
مغاورى"كانت مأجرة شقة فى العمارة اللى بشتغل فيها"  
مراد"من امتى"  
مغاورى"قعدت يجيلها سنة ولا اكثر"  
مراد"وسمعتها؟"  
مغاورى"مكنش حد بيجيلها ولا حاجة ياباشا"  
مراد"يعنى فجأة بقت كده؟؟"  
مغاورى مترددا"لا مش فجأة ولا حاجة... بس يعنى "  
مراد"بس ايه... ماتحكى على طول"  
مغاورى"كانت تبع جمال بيه"  
مراد"جمال بيه مين؟"  
مغاورى"جمال بيه العشرى... صاحب العمارة"  
مراد وهو يردد المعلومة  
"آآه جمال العشرى رجل الاعمال... يبقى صاحب  
العمارة وكان مرافقها؟؟"  
مغاورى منكس الرأس  
"ايوه يا باشا"  
مراد"وسابوا بعض ليه؟"  
مغاورى"جمال بيه عنده مكتب فى العمارة وكان  
ساعات كده بيروح لها شقتها... اليوم اللى روجت

لغريب ادور لها على شقة ده كان يوم ما مرات البيه  
عرفت"

مراد"عرفت ايه؟"

مغاورى"عرفت ان جوزها والست ساندى يعنى مع  
بعض... جت العمارة وطلعت على شقة الست ساندى  
على طول ومسكتها فرجت عليها الناس وبهدلتها ورمتها  
بره الشقة وهددتها لو قربت من جوزها تانى هتخفيها  
من على وش الارض ولما الست ساندى ردت عليها انها  
متقدرش تعمل لها حاجة قالت لها اى بلطجى بملايم  
مممكن يشوهها وميخليش حد يبص لها وساعتها هي اللي  
هتستخبي من الناس وقالت لها لو مسمعتيش الكلام  
هتشفوى انى مش بقول كلام ع الفاضى"

مراد"الكلام ده كان امتى؟"

مغاورى يفكر وهو يسأل غريب

"يوم ما جيت لك بيها كان من امتى"

غريب"٣ شهور"

مراد لغريب"انت تعرف جمال العشرى"

غريب"اه اعرفه ما احنا بيننا وبين عمارته شارعين  
بس"

مراد"كان بيجيلها؟"

غريب"لا... محصلش"

مراد"متأكد؟؟"

غريب"انا مشفتوش خالص واكيد لو كان جه كنت  
هعرفه"

مراد"يمكن جه وانت مش موجود"

غريب"يعنى حتى لو مشفتوش طالع اشوفه نازل مثلا  
بس محصلش انى شفته خالص"

---

هاجر فى المكتب... تنتظر للساعة بين اللحظة والاخرى  
تعمل بذهن شارد... تركت الاوراق التى كانت ترتبها  
بطريقة تحسم بها تفكيرها... واتصلت بوليد  
اول ما نطقت فور سماعها رده  
"الو... انت فين يا وليد؟؟ مالك فى ايه؟؟ مش طبيعى  
وكل مرة اتصل بيك تقفل معايا فى الكلام... قلت هتيجى  
المكتب مجتش... يعنى كنت مستنية اليوم اللى بابا  
يسينى ارجع الشغل علشان نشوف بعض الاقايك انت  
اللى مش عايز تيجى... لا متتعيش نفسك وتيجى خليك  
براحتك... مش زعلانة... مع السلامة"  
انهت هاجر المكالمة وقلبها حزين من المعاملة الجافة  
التي يعاملها بها وليد والتي لا تعرف لها سببا

---

مراد فى مكتبه... يتحدث فى التليفون  
"ايه يا حضرة الطابط... كل ده بستناك علشان تجيبلى  
بيان المكالمات؟؟ ما انا عارف انك كنت هتطلع اذن  
نيابة بس انا كنت عايزه النهاردة... ماشى يا ماجد بكرة  
الصبح يكون عندى... والتحريات اللى طلبتها منك على  
ابوها جبتها؟؟"



صوت ماجد يرد على سؤاله  
"ايوه باباشا... هو فى الاوضة دى من حوالى ٨ ل ١٠ سنين  
محدث يعرف حاجة عن حياته قبلهم... مدمن  
حقن وبيشتغل كل شوية ف حطة شكل وفيه ناس بتقول  
انه بيوزع علشان يعرف يجيب حق المخدرات بس  
مالوش اى سوابق قبل كده وعایش فى الاوضة دى  
لوحده ومحدث شاف له اى قرابى خالص ولا حد  
يعرف ان له بنت "  
مراد"تمام اوى يا حضرة الطابط...شكرا على  
تحياتك...مستنى بكرة بيان المكالمات"  
ماجد"تحت امرك يا فندم...تؤمرنى بحاجة تانية؟"  
مراد"لا شكرا...مع السلامة"

---

مراد يصعد نفس العمارة التى جاء اليها صباحا  
متجها مباشرة لغرفة على سليمان دون السؤال  
وجده امام غرفته يجلس مع اخر يدخنون الشيشة  
اقترب منهم مراد  
"سلامو عليكمو... ازيك ياعم على"  
رد احد الرجال عليه  
"وعليكم السلام... الحمدلله...افندم"  
مراد"مقدم مراد حسنين من المباحث"  
امتعع وجه الرجلان وقاما واقفان...انسحب الرجل الاخر  
بهدوء وترك على فى مواجهة مراد

بادره على "الشيثة مفيهاش حاجة يا بيه ولو ع الشيثة  
ادغدغها"

وهم على ان يحطم الشيثة فعاجله مراد قائلا  
"لالالا الموضوع مالوش علاقة بالمخدرات خالص"  
بدأ على يلتقط انفاسه بعدما اطمئن قليلا... وسأل مراد  
"خير؟؟"

"انا جاى ابلغك خبر وفاة بنتك... البقاء لله"  
"بنتى!!!!!"

رد على بكل تعجب ودهشة... واكمل موضحا  
"بنتى مين يا باشا... انا لاعمرى اتجوزت ولا خلفت"  
هم مراد ان يوضح مقصده... ولكنه عدل عن رأيه  
ومد يده مصافحا على بابتسامه اصطنعها وبدت طبيعية  
"انا اسف... واضح ان فيه لابس فى الموضوع وفيه  
تشابه اسماء"

غادر مراد السطح دون ان ينظر خلفه  
فى حين وقف على مأخوذا مما حدث  
فمنذ لحظات كان يعتذر له احد الضباط... لايد ان تكتب  
فى التاريخ... على سليمان الذى يخشى ان يمر بجوار  
قسم شرطة يصافحه ويعتذر له ضابط مباحث  
وقف مزهوا بنفسه... تقدم إليه جاره بخطوات بطيئة  
خائفة

سأله "ايه؟؟ كان عايزك فى ايه"  
جلس على وامسك الشيثة فى يده وسحب نفسا عميقا  
ونفت دخانه فى الهواء  
"ابدا... تشابه اسماء وانأسف لى ومشى"

هاجر تطرق الباب على مكتب زياد... تدخل  
"استاذ زياد محدش بره... عايزنى فى حاجة؟"  
"لا يا هاجر شكرا... اتفضلى انتى لو خلصتى شغلك"  
"اه كله تمام... تصبح على خير"  
"وانتى من اهله"

خرجت هاجر من المكتب ... عندما وصلت لمكتبها  
وجدت وليد فى انتظارها  
"اهلا"

قالتها ببرود وذهبت لترتب بعض الملفات التى على  
مكتبها... اخذت حقيبتها

"انا ماشية... زياد جوه... سلام"

اسرعت فى خطواتها بنفس سرعتها فى القاء كلماتها  
تبعها وليد بخطوات واسعة كخطواتها  
"انا جاى لك انتى مش لزياد"

ابطئت خطواتها وهى تهبط الدرج ووليد خلفها  
"والله؟؟ الحمد لله انى جيت على بالك"

"ايه يا هاجر طريقة الكلام دى... من امتى كنتى قماصة"  
وصلوا للشارع... عندها سار وليد بجانبها وكل منهما  
ينظر امامه ولا ينظر للاخر  
"مش قماصة يا وليد... بس بجد متضايقه من نفسى اوى"  
"ليه؟"

"واضح انى ضغطت عليك لما قلت لك تعالى بسرعه  
لبابا... يمكن كنت بدأت تفكر وتصرف نظر عن الحكاية  
كلها ومكالمتى ليك ورطتك"

"بلاش هبل يا هاجر الله يخليكى انا مش ناقص"  
التفتت له هاجر  
"مش ناقص ايه؟؟ يعنى فيه حاجة انا مش عارفها"  
"مفيش.. انا بس عايزك تستحملينى... لو بتحبينى  
استحملينى الفترة دى"  
نبرة صوته كانت حزينة بالفعل... شعرت هاجر بالأسى  
لحزنه  
"مالك يا وليد؟؟ مخبى عنى ايه؟"  
"متشغليش بالك انتى... خير ان شاءالله"  
"ازاى مشغلش بالى... لو منشغلتش بيك انت هنشغل  
بميين يعنى؟"  
"مشكلة ف الشغل"  
"مشكلة ايه؟؟ انت لا ماسك عهدة ولا حسابات ولا معاك  
ختم يخليك خايف وقلقان كده... اتخانقت مع حد  
طيب؟؟؟"  
"مفيش حاجة من دى"  
"طب ايه؟"  
"مفيش يا هاجر متضايق من الشغل وخلص... مش  
الشوية الصغيرين اللى هنكون مع بعض فيهم هنتكلم عن  
مشكلتى... انا مش عايز افكر فى اللى قلقنى... ممكن؟"  
ردت هاجر بقلة حيلة وهما يكملان طريقهما  
"ماشى... اللى تشوفه"

مراد فى مكتبه... ينتظر ماجد  
دخل ماجد بلهفة  
"افندم سعادتك... بيان المكالمات جاهز... اتفضل"  
تناوله مراد وقيل ان ينظر فيه  
"عايزك تطلع ع النيابة تجيب لى اذن بالقبض على على  
سليمان"  
"اه صحيح... ايه اللى حصل امبارح"  
"روحت ولسه بقوله البقاء لله فى بنتك قالى انا لا عمرى  
اتجوزت ولا خلفت"  
"وده معناه ايه"  
"حاجة من ٢... ٩٠% برجح انه متبرى منها وممكن  
جدا يكون هو القاتل بعد اللى عرفه عنها... و ١٠% انه  
يكون صادق"  
"واللى هيحسم؟؟"  
" DNA ... علشان كده بقول تطلع اذن من النيابة  
للتحفظ عليه نتأكد بالتحليل ومن البصمات "  
"تمام سعادتك يا باشا... شفت حضرتك بيان المكالمات  
قد ايه"  
نظر مراد نظرة عابرة على الاوراق فى يده  
"كل دى مكالمات؟؟ واحنا هنفحص كل دول امتى"  
"ربنا يقويك يا فندم"  
كانت عين مراد تبحث عن اسم صاحب المكالمة الذى  
سبّه واغلق الخط فى وجهه  
ردد مندهشا  
"جمال العشرى!!!!!"

توقف ماجد قبل ان يفتح الباب ويغادر

"بتقول حاجة يا فندم؟؟"

"اللى اتصل ساعة المعاينة جمال العشرى... مكالمات

كثير من جمال العشرى... واضح ان العلاقة منتهتس زى

ما وضحوا واللى اتغير مكان المقابلات بس"

"جمال العشرى اتصل بيها ساعة المعاينة... يعنى بعيد

عن الشبهات... لو كان قتلها مكنش اتصل بيها بعد ٢٤

ساعة من موتها"

"بص ياماجد... قضيتنا شكلها متشعبة ومش سهلة...

ومفيش حد بعيد عن الشبهات... بس العلاقة المستمرة

بجمال العشرى تفتح لنا مشتبته به جديد... وهى

مراته.. لو عرفت بعلاقة جوزها بسناء وربطنا ده

بالتهديد الاولانى يبقى مراته عندها دافع الانتقام"

"والمطلوب منى غير القبض على على سليمان؟؟"

"استدعاء جمال العشرى ومراته"

"علم وينفذ... بعد اذنك"

---

وليد لم يهدأ باله بعد... الايام الماضية لم تطمئنه وان

كانت جعلته اهدأ قليلا واعطته شعورا بأنه لو كان

متورطا بالفعل كان تم القبض عليه

فضوله لم يثنيه عن شراء جميع الجرائد الصباحية

والمسائية لعله يقرأ ما يقر عينه وهو القبض على القاتل

الحقيقى

بحث ولم يجد اى خبر جديد عن الجريمة... لا عن  
تحقيقات ولا عن القاء القبض على القاتل  
ظل يفكر... كيف يمكنه ان يعرف اخبار سير التحقيقات؟

---

اثناء القبض على على سليمان... ظل يصرخ وهو ينفى  
وجود اى مخدرات بحوزته وان ما يشاع عنه محض  
افتراء  
لم يفصح ماجد عن سبب القبض عليه بل ظل صامتا  
حتى وصلوا لمكتب مراد

تعجب على من وجوده فى مكتب مراد الذى كان منذ  
ساعات يعتذر له  
"خير يا باشا... مش حضرتك كنت عندى امبارح... هو  
فيه ايه؟"  
"مفيش ياعم على... عايزين نتأكد بس كلامك صح ولا  
كذب"  
"كلام ايه"  
"بنتك"  
"يا باشا بنتى مين ومنين... انا طول عمرى عايش كده  
حر طليق لا عمرى ربطت نفسى ببيت ولا بعيال...  
وبطقتى اهى مكتوب فيها اعزب"  
"والبنت اللى بطاقتها على اسمك وعنوانك... دى از اى  
يعنى؟"  
"اعرف منين انا بس"

"طيب افنكر كده يمكن من زمان كنت اتشاقيت شوية  
وخلفت وانت مش عارف"  
"محبش الستات ... مزاجى مبيجيش عليهم"  
"وده معقول يعنى؟"  
"اهو تقول ايه... بالله فى خلقه شئون"  
"ونعم بالله... انت بتشتغل ايه؟"  
"عامل نظافة فى سوپر ماركت كبير"  
"مواعيد شغلك ايه"  
"من ٤ العصر ل ١٢ بالليل"  
صمت مراد يفكر...  
"امبارح انا كنت عندك الساعة ٩ ونص \ ١٠ تقريبا  
ومكنتش فى شغلك"  
"امبارح راحتى الاسبوعية"  
"واول امبارح"  
"كنت ف شغلى"  
"مخرجتش منه؟"  
"مينفعش يا بيه... معندناش خروج وقت الشغل خالص"  
"طيب... انت مشتبه فىك فى قتل بنتك"  
"يا بيه معنديش بنات ولا صبيان... وايمانات المسلمين  
ما عندى عيال"  
"هنتأكد بتحليل صغير اذا كانت القتيلة بنتك ولا لا"  
رد على بفرع  
"تحليل ايه... تحليل لأ يا باشا"  
رد مراد بحزم  
"وانت خايف من ايه؟؟ لو هى مش بنتك هتخاف ليه"  
وبتردد سأله على بصوت خفيض مرتعش



"أأأ أصل... التحليل ده... انا خايف يوديني ف داهية"  
"ماتعترف انها بنتك وخلص... لو مقتلتهاش هتخاف  
من ايه"  
"انا معرفهاش ومليش بنات ولا صبيان زى ماقلت... انا  
خايف علشان يعنى.... بصراحة كده التحليل هيطلع فيه  
مخدرات"  
صرخ فيه مراد بنفاذ صبر  
"انت عمال تصدعنى كل ده وتلف وتدور علشان  
المخدرات... قتلتك القضية مالهاش علاقة  
بالمخدرات... هتعمل التحليل غصب عنك"  
رد بخوف "حاضر... حاضر"

---

تم استدعاء جمال العشرى وزوجته للتحقيق  
تركهم مراد فى الخارج متعمدا وطلب من ماجد ان  
يراقب تصرفاتهم اثناء الانتظار

دخل ماجد مكتب مراد  
"ايه يا ماجد؟؟"  
"الأتنين قاعدين مبيتكلموش بس التوتر ظاهر عليهم...  
النظرات بينهم مش طبيعية"  
"مش طبيعية ازاي"  
"يعنى زى مايكونوا متخانقين... مش طايقين بعض...  
بيحملوا بعض المسؤولية"  
"مسئولية ايه بالضبط"

ابتسم ماجد وهو يجيب  
"انا معرفش ياباشا... انا بستنتج بس"  
ضحك مراد  
"معلش ياماجد الواحد تفكيره تعب من القضية دى...  
دايرة الاشتباه بتوسع والبصمات كتير والواحد يلماها من  
ناحية تفتح من ناحية ثانية"  
"كان الله فى العون يا فندم"  
"هو تقرير الطب الشرعى اتأخر ليه"  
"بكرة بالكثير يكون خلص ان شاء الله... انا متابع والله"  
"ماشى يا ماجد... ابعتهوملى... ولا اقولك هات الراجل  
الاول... وروح خد اللاب توب بتاعها للخبير واقعد معاها  
وشوف يمكن تدلنا على اى حاجة"  
"حاضر يا فندم... يعد اذنك"

خرج ماجد ودخل جمال العشرى  
"صباح الخير"  
"صباح النور"  
شاور له مراد بالجلوس فجلس  
"خير... ممكن اعرف انا مطلوب فى ايه"  
"مش انا قتلتك لما اتصلت ان سناء اتقتلت"  
ارتبك جمال بعد ان كان محافظا على هدوءه  
"انا... يعنى... طيب ايه علاقتى بالموضوع ده"  
"انت الاول مدين ليا باعتذار ع الشتيمة"  
"انا اسف... انا مكنتش اعرف مين اللى بيرد"  
"ماشى... ايه علاقتك بسناء"  
"تقصد ساندى"

"الاتنين عندى واحد"  
"اتعرفنا على بعض من سنة ونص تقريبا... عجبنتى  
ودخلت دماغى... مش عارف حبيتها ولا اتعودت  
عليها"  
"اتعرفت عليها ازاي"  
"كنت سهران فى مكان مع ناس اصحابى... جت سلمت  
على واحد فيهم وعزم عليها تقعد معانا شوية... يومها  
هى حست باعجابى بيها وانا ماشى كتبتلى رقم تليفونها  
وتانى يوم اتصلت بيها وبقينا نتقابل من يومها"  
"وانت عارف هى بتشتغل ايه؟"  
صمت لحظات ورد  
"اه... بس هى بطلت لما كانت معايا"  
"ليه متجوزتهاش"  
"مينفعش اتجوز واحدة سمعتها كده ولا اتجوز على  
مراتى من اساسه وانا رجل اعمال كبير سمعتى تتأثر...  
انا فعلا زعلان اوى عليها ونفسى تعرفوا مين اللى عمل  
كده"  
"كمل بقية معرفتك بيها"  
"لما اتعرفنا على بعض... كنا بنتقابل تيارى كده  
ومكنتش حابب ده فاخذت لها شقة ف عمارتى واتكفلت  
بكل مصاريفها وقعدتها من الشغل وفضلنا كده حوالى  
سنة"  
"لحد مراتك ماعرفت"  
"بالظبط... راحت عملت فضيحة فى العمارة وطبعاً  
طردت ساندى قدامها وقطعت علاقتى بيها"  
"والحقيقة؟؟؟"

"الحقيقة اننا خلينا مقابلاتنا محسوبة شوية...يعنى بطلت  
اروحها خالص...هى بطلت تتصل بيا غير لما اتصل  
انا بيها"  
"وكنت بتتكفل بيها برضه"  
"عمرى ما بخلت عليها بفلوس...انا كنت بدفع لها فلوس  
الشقة ومصروف شهرى"  
"عرفت ان مراتك هددتها"  
"ايوه...بس اى واحدة ف مكانها هتقول كلمتين غضب  
يعنى ده مش دليل على انها قتلتها"  
"هنشوف... انت كنت فين يوم الحادثة"  
"انا كنت مسافر ايطاليا ورجعت اول امبارح على شرم  
الشيخ وكنا هنقعد ٣ ايام هناك... كانت المفروض  
طيارتها هتوصل ٧ بالليل... لما اتأخرت اتصلت بيها  
اشوف مجتثس ليه...ساعة مارديت عليا وقتلتى انها  
اتقتلت"  
"وانت وصلت من ايطاليا امتى"  
"فى نفس اليوم الساعة ١٢ الظهر"  
"طيب ياجمال بيه...ياريت لو افكرت اى حاجة جديدة  
تعرفنا بيها...متشكر"

ضرب مراد الجرس للعسكرى.... واستدعى زوجة  
جمال

وليد وهو عائد من عمله... وجد محل هانى مفتوحا  
دخل... كان المكان خاليا تماما سوى من هانى  
"وليد... ايه الاخبار"  
"مفيش اى جديد يا هانى... هتجنن عايز اعرف ايه اللى  
حصل"  
"انت مالك ياعم... الحمد لله فات ٣ ايام اهو ومحدث جه  
جنبك"  
"انا برضه مش عارف... يعنى لقوا القاتل ولا ايه اللى  
حصل"  
"انت مالك... اكفى ع الخبر ماجور وكأنه محصلش  
وعيش حياتك طبيعى"  
"مش عارف ارتاح... خايف... حاسس ان ف اى لحظة  
ممکن رجلى تيجى ف القضية دى"  
"انت مش برئ؟! "  
"برئ طبعا"  
"خلاص ... فكك بقى"  
"انا بفكر ارواح هناك واطقس على الاخبار من بعيد"  
صرخ فيه هانى  
"انت حمار؟!!"  
"ليه يعنى... هو انا هروح اقولهم انا كنت موجود انا  
قصدى ارواح اسأل فى المنطقة من بعيد"  
"تبقى اتجنيت رسمى... انت متعرفش انهم بيقولوا  
المجرم بيرجع مكان جريمته تانى... لو روحت والست  
اللى شافتك دى شافتك تانى يبقى انت لبستها رسمى"  
نظر له وليد... وبتردد  
"طيب ماتروح انت"

"نعم؟؟!! وانا مالى ياخويا...وليد...انسى الموضوع ده  
وخليك طبيعى...لو كانوا لسه ممسكوش القاتل كان  
زمانهم وصلوا لك"  
"انت شايف كده"  
"مفيش الا كده"

---

دخلت السيدة امينة المتولى زوجة جمال العشرى مكتب  
مراد

سيدة فى الاربعينيات انيقة جميلة تبدو من طبقة ثرية  
بنظرة سريعة من مراد ادرك انها تبدو شخصية معتزة  
بنفسها حين قدمت نفسها باسمها الثلاثى ليدرك مراد انها  
بالفعل ابنة عائلة معروفة بأعمالها وشركاتها ومصانعها  
"اتفضلى"

جلست وسألته بهدوء

"حضرتك طلبتني ليه؟؟خير؟؟"

"للتحقيق فى قتل سناء سليمان الشهيرة بساندى"

"وانا ايه علاقتى"

"جوزك"

"لو هو على علاقة بيها اسألوه لوحده مش تسألونى انا"

"الكلام ده لو كنتى بره الشبهات"

"نعم!! شبهات ايه "

وضحكت بصوت هادئ ضحكة قصيرة ثم سألته

"انت متخيل انى ممكن اقتلها؟"

"مش ده كلامك؟"

"محصلش"

"عندنا شهود على تهديدك ليها من حوالى ٣ شهور"

"ده كان كلام وخلص"

"فيه سؤال بيلح عليا بعد ما شفتك"

"اتفضل اسأل"

"واحدة زيك فى مكانتك الاجتماعية وواضح انك تربية

هاى كلاس ومتقفة ... تروح تعمل فضيحة لعشيقه

جوزها زى لامواخذة يعنى الستات الجهلة"

"مشاعر الست مفيهاش تربية هاى كلاس او لولو

كلاس...مفيهاش فرق بين متعلمة وجاهلة...الزوجة هي

الزوجة وخصوصا لو بتحب جوزها"

"طيب ليه محلتيش الحكاية بينكم وبين بعض"

"جريت وفشلت...وانا عارفة ان جمال بيخاف على

سمعته وسمعة بناته فاضطريت انى اضغط عليه انه

يسيبها"

"وسابها؟"

"لو كان سابها من ساعتها مكنش زماننا موجودين هنا"

"شكالك مش متفاجئة؟"

"متفاجئة او لأ معتقدش هتفرق معاك فى حاجة...انت

جايبنى تحقق معايا فى جريمة ماليش علاقة بيها... لو

عندك اى حاجة تديننى تقدر تقولى عليها واكلم المحامى

بتاعى علشان يحضر معايا التحقيق"

لم يجد مراد ما يرد به عليها... ثقته الزائدة بنفسها

اثارت شكوكه اكثر...سألها مباشرة

"كنتى فىن يوم الاحد ما بين الساعة ٩ و ١١ بالليل"

"انا كل يوم بالليل فى النادى لحد الساعة ١... وطبعا  
عندى شهود بيشفونى يوميا لو تحب تسأل"  
ابتسم مراد ابتسامه مصطنعة  
"مفيش داعى... تقدرى تتفضلى بس ياريت متسافر يش  
اى مكان بره مصر من غير ابلاغنا"  
ردت قبل ان تغادر  
"او ك... بعد اذنك"

---

دخل ماجد مكتب مراد باللاب توب الخاص بساندى  
مراد"ايه الاخبار"  
"كلام كتير مع ناس كتير اغلبه بببدا بالرسائل وينتهى  
بانهم يكملوا بالصوت والصورة"  
"يعنى استفادتش منه حاجة"  
"الاستفادة الوحيدة انى اتأكدت ان القضية دى هتهد حيننا  
مع الناس الكثير اللي لازم يدخلوا دايرة الاشتباه"  
هز مراد رأسه  
"ده اكيد"  
"اخبار التحقيق مع جمال العشرى ومراته ايه؟"  
"جمال العشرى معندوش دافع ولا كان متواجد فى  
مصر... انما مراته بقى"  
"هااا"  
"مرتبة نفسها كويس اوى وبترد ع السؤال قبل ما  
اجاوبه ومحضرة حجة غياب"  
"ماهو طبيعى انها مش هتقتل بايدها"



"بالظبط بس لو مسكنا القاتل واعترف بتحريضها هيبقى  
دليل اثبات عليها... علشان كده هنستدعى الست اللي  
شافت القاتل... عايزها من الصبح بدرى عندى"  
"امرك يا باشا"  
سمعا طرقات على الباب... اعقبها دخول عسكري  
"تقرير الطب الشرعى فى جريمة قتل مدينة نصر يا  
باشا"

تناوله مراد بلهفة... ما ان قرأه حتى وضعه امامه على  
المكتب

ماجد "فيه جديد؟"  
مراد "لا.. سبب الوفاة جرح قطعى فى الرقبة بألة حادة  
ومفيش اى اعتداء بدنى ولا جنسى"  
ماجد "لدرجة دى محاولتش حتى تقاوم"  
مراد "يمكن اللى قتلها خبرة... من ضربة واحدة خلص  
على طول"  
ماجد "ده يخلينا نرجح احتمال مرات جمال  
العشرى... طيب وعلى اللى فى الحجز ده"  
مراد "بالنسبة لعلى سواء ابوها او مش ابوها... بصماته  
وحجة غيابه تبعده عن الشبهات... بس لو ابوها يستلم  
الجثة ونخلص انما لو مطلعش ابوها ببقى بتتفتح لنا سكة  
جديدة وهى ليه على اسمه وعنوانه وفين اهلها  
الحقيقيين"  
ماجد "هى قضية باينة من اولها"

طول اليوم ووليد يفكر فى كلام هانى... هانى مُحق فعلا  
من الاكيد انه تم القبض على القاتل الحقيقى والا كان تم  
القبض على وليد ان وجد اى دليل ضده  
فكر كثيرا حتى استراح لتلك النتيجة  
شعر ان الايام الماضية كانت كابوس ثقيل صنعه خوفه  
ووهمه  
خرج من حجرته...حلق ذقنه... انتقى ملابسه بعناية  
وذهب لهاجر

---

هاجر جالسة على مكتبها...المكتب خالى  
وكعادتها اثناء خلو المكتب تضع سماعات الموبايل فى  
اذنيها وتستمع لبعض الاغانى  
فوجئت بدخول وليد حليق الذقن ومهذم والابتسامة على  
شفتيه  
تعجبت من تبدل حاله  
اقترب منها وهو يصافحها  
"وحشتينى"  
"سبحان مغير الاحوال"  
جلس قبالتها وهو يأخذ السماعات يضعها على اذنه من  
بعيد  
"كنتى بتفكرى فيا وبتسمعى ايه"  
"الراجل ده هيجننى"  
ترك السماعات بعد ان سمع ماكانت تسمع  
"انتى هتتصبى...محمد منير اللى بيغنى"

"ماهو انا لما شفت حالك المشقلب ده وفكرت فيك كان  
لازم اسمع الراجل ده هيجننى"  
"هو زياد مش هنا ولا ايه؟"  
"لا مش هنا... راح القسم"  
"طيب ما تقومى نخرج شوية"  
"مينفعش... فهمنى بس مشكلة شغلك اتحلت الحمدلله"  
"الحمدلله"  
"بسرعة كده... وبسرعة كده حالك اتبدل"  
"انا كنت مكبر الموضوع وطلع بسيط... متفكرنيش بقى"  
قالت وهى تضحك  
"حمدالله ع السلاااااااااااااااااا... وليد اللى اعرفه وحشنى  
والله"

---

فى صباح اليوم التالى... دخل ماجد لمراد مكتبه  
"صباح الخير ياباشا"  
"صباح النور"  
"الشاهدة بره... وعندى خبر كده"  
"خير؟"  
"بصمات على سليمان مش متطابقة مع اى بصمات فى  
مسرح الجريمة وفعلا مسابش شغله يوم الحادثة"  
صمت مراد يفكر وهو يفرك جبينه وكأنه يعنصر افكاره  
ماجد منتظر تعليق من مراد على ما قاله  
مراد"هات الشاهدة لما نقولها عايزين منها ايه بالظبط"

منيرة جالسة فى مكتب مراد  
"معلش يامدام هنتعبك معنا شوية"  
"خير؟"

"كنتى قلتى انك شفتك القاتل واحنا شاكين انه متأجر  
للقتل... علشان كده ماجد بيه هياخدك ويعرض عليكى  
صور المسجلين... معلش احنا ممكن نطول شوية  
وهنعرض عليكى صور كثير بس انتى كده بتساعدنا  
لتحقيق العدالة"  
"تحت امركم... انا كده كده فاضية وان شاء الله نلاقيه"  
ماجد "اتفضلى معايا"

---

فى نهاية اليوم... مراد فى مكتبه وامامه عدة اوراق  
يتصل بماجد ويستدعيه... بعد ساعة يأتيه ماجد  
"مساء الخير يا باشا"  
"مساء النور... ايه الاخبار؟"  
"الست قعدت طول اليوم تدور معايا وموصلناش  
لحاجة"  
"خلصت كل اللي عندك"  
"لا طبعا... قتلها تيجى تانى بكرة"  
"بص يا ماجد... انا قرريت كل التحريات اللى عملتها  
على المتصلين بالقتيلة فى الفترة الاخيرة بس كلها  
تحريات مش كافية"  
"يا مراد باشا التحريات مبدئية والوقت ضيق والناس  
كثير جدا"

"طيب انا عملت قوايم باسماء الناس اللي هنتدعيها ...  
فيه ناس متصلة بيها فى يوم الحادثة ودول مش كثير  
...اه... عايز جارتها تكون موجودة برضه اثناء التحقيق  
ده يمكن تتعرف ع القاتل... قولى زهقتك؟؟ اكيد ضايقتك  
علشان قعدت وقت طويل ولسه هنجيبها تانى"  
"بالعكس دى متعاونة جدا ومتحمسة...واضح انها عندها  
وقت فراغ كبير فمساعدتها لينا مفرحها"  
"جميل اوى...ياللا من بكرة تبعت الاستدعاءات ويكونوا  
عندى بعد بكرة...حاول موضوع عرض صور  
المسجلين ده تخلص منه بكرة بأى طريقة ... علشان  
عايزها بعدُه هنا"  
قاطعهم صوت طرقات على الباب  
دخل العسكري مهرولا  
"ألحق يا باشا...الراجل اللي اسمه على سليمان ده واقع  
فى الحجز قاطع النَّفس"

---

وليد وهاجر فى احد المطاعم...يتناولان الغداء  
تبدو السعادة عليهما...تتنظر هاجر فى ساعتها  
"ايه بتبصى فى الساعة ليه؟"  
"خايفة تتأخر"  
"يابنتى انا مستأذن من باباكي وقلت له هنتغدا وارجعك  
على طول"  
"ايوه بس هو قالى متأخرش وانا مش عايزة ازعله "  
"مش هنتأخر... تصدقى باباكي طلع طيب غير ما كنت  
فاكر"

"ابا حنين وطيب ويحب يفرحني بس هو عنيد اوى  
وميحبش اللي ميسمعش كلامه او يعمل حاجة من  
وراه...ودى كانت المشكلة ان هو كان فاكر علشان  
بحبك يبقى كنت رايحة جاية معاك من وراه"  
رد وليد وهو يتذكر حالته ويأسه فى تلك الفترة  
"ايام ربنا ما يعيدها"

رن تليفون وليد... نظر فيه وجد اسم هانى...رد  
"الو...ازيك ياهانى"  
"وليد انت فين؟"  
"انا مع خطيبتي...خير"  
"لو هى جنبك قوم علشان تعرف ترد عليا"  
توجس وليد من نبرة قلق هانى... استأذن قليلا من هاجر  
وذهب لخارج المطعم  
"ايه ياهانى.. فى ايه"  
"انا شفت عسكري طالع العمارة عندكم...الفار لعب ف  
عبي قمت طلعت للحاجة وعملت انى بسأل عليك  
وسألتها كان فيه عسكري فى العمارة لمين...قالت ان  
جايلك استدعاء من المباحث"  
ارتبك وليد واختنق صوته وبصعوبة رد على هانى  
"يبقى ملفوش القاتل ياهانى... رجلى جت خلاص"  
"اجمد بس... انا قلت اقولك علشان تبقى عارف"  
"والعمل...انصرف ازاي"  
"مش عارف يا وليد والله... روح واعمل نفسك متعرفش  
حاجة"

"ورقمى والست اللي شافتنى؟؟ انا كنت عارف انى  
لابسها لابسها"

"ياعم انت معملتش حاجة...طيب ما تقولهم الحقيقة  
وخلص"

"ياسلاااااااا... انت مسمعتش عن التعذيب اللي بيحصل  
والاعترافات اللي بتكون تحت الضغط"  
"هتعمل ايه طيب"

"مفيش الا انى اهرب...انا مش بتاع بهدلة "  
"والهرب مش بهدلة... وهتهرب تروح فين"  
"معنديش حل تانى ياهانى... هروح لاختى فى البلد"  
"وامك... وخطيبك هتقولهم ايه؟؟"

نظر وليد لداخل المطعم...وجد هاجر تنظر اليه عبر  
الزجاج بقلق  
"هقولهم اى حاجة... هخاف ارجع البيت يكونوا  
مستنبيينى"

"طيب يا وليد... بقولك ايه هات تليفون تانى وخط وابقى  
كلمنى منه اقولك الاخبار... احتياطى برضه"  
"ماشى... متقولش حاجة لحد"  
"طبعا من غير ماتقول...سلام"  
انهى وليد المكالمة... وعاد لهاجر

هاجر كانت تتابع ردود فعل وليد اثناء المكالمة  
احتارت فى ردود افعاله الغريبة وارتابكه  
عندما عاد اليها  
"لو خلصتى يالا بينا"

"فى ايه.. ايه المكالمة دى اللى قلبتك كده"  
"اختى عايزانى فى مشكلة يهاجر ولازم اسافر لها  
حالا"

"اختك!! انت مش قلت هانى "  
"ايوه هانى اللى كلمنى اصل اختى كلمتنى على تليفون  
الساير"

"ليه مش على تليفون البيت ولا الموبايل"  
"علشان مش عايزة ماما تعرف...بطفى اسئلة بقى  
ياهاجر انا مش ناقص"  
"مالها اختك طيب"

"لما اروح لها هعرف... واوعى تقولى لماما حاجة"  
"انت مش طبعى يا وليد...بتلاوعنى"  
رد عليها بعصية

"مش وقته يهاجر.... هتقومى ولا اسيبك وامشى"  
تعجبت هاجر من اسلوب وليد...لم يكن يضيق بها من  
قبل

ماذا حدث له منذ ان حُطبا؟؟!!  
خشيت ان يلاحظ رواد المكان مايدور بينهما  
نهضت وتبعته فى استسلام بعد ان دفع قيمة الغداء اثناء  
خروجه  
ولاحظت انه لم ينتظر ان يأتيه احد بالحساب

اثناء ركوبهما فى التاكسى  
كانا متجاوران فى المقعد الخلفى  
كل منهما يدور بداخله حديث يشغله عن الاخر



وليد" خلاص يا وليد... عرفوا انك كنت هناك... لو كنت  
شفت القاتل كنت برأت نفسي وحكيت اللي حصل ...  
انما كده مين هيصدقني... مفيش مفر من الهرب... بس  
لحد امتي... مش عارف... يمكن لحد ما يلاقوا القاتل  
الحقيقي... ايوه... اكيد هيلاقوه... بدل مش انا يبقى فيه  
قاتل حقيقي ولازم بوصلوا له... هيوصلوا له ازاي...  
مش عارف... مش شغلتي... خليني ف نفسي... مش  
لازم حد يحس بيا هناك... بس ازاي والبلد مبيستخباش  
فيها سر ابدأ... واستخبي ليه هما فى البلد يعرفوا منين  
انى هريان... انا اروح واعيش عادى... ايوه اروح  
واعيش هناك عادى محدش هياخد باله"  
اما حديث هاجر الصامت فكان حديث من نوع آخر  
"وليد مخبي عليا حاجة... ايه اللي مخبيه عليا ومش  
عايزنى اعرفه... حب حد تانى... واحدة تانية شاغلاه  
عنى؟؟ وايه حكاية السفر المفاجئ دى... كل ده  
وبيز عقلى ويقولى اسبيك ولا امشى... انا غلطانة  
...مكنش المفروض امشى معاه كده... على الاقل كنت  
سبته انا ومشيت... واضح ان كل اللي كنت بسمعه  
صح... كل الرجالة زى بعض... يتمسكن لحد ما  
يتمكن... وليد الحنين الطيب اللي بيحبنى وعمره  
ماز على بعد ما اتأكد انى بقيت ليه اتغير واتقلب  
عليا... انا غلطانة وانا اللي استاهل انى سكت له لما  
زقق"

واختلست نظرة له بجوارها... رأته ينظر للخارج بشرود  
اعادت نظرها للجهة الاخرى بقلب حزين و عيون دامعة

فور علم مراد بأن على سليمان "قاطع النفس"  
لم يستطع فهم ما يقصده العسكري... فذهب مسرعاً  
وماجد يتبعه للحجز  
عندها وجد على سليمان ممداً على الأرض وحوله  
مجموعة من زملاؤه منهم من يحاول افاقته ومنهم من  
يشاهد فقط

صرخ فيهم مراد  
"ايه اللي حصل... جد ضربه؟"  
سمع مهمات كثيرة من الموجودين مفادها ان الكل ينكر  
اردف احدهم  
"يا باشا هو من امبارح تعبان وبيتوجع وطول الليل  
بيصّب عرق وجسمه كله بيوجعه وفجأة كده وقع... بس  
لسه فيه النفس"

وجه مراد او امره لاحد العساكر  
"اطلب الاسعاف فوراً"

---

عندما وصل وليد وهاجر بالتاكسي تحت منزلها  
نزلاً... لم يتبادلا الحديث للحظات  
تركته هاجر متجه لمدخل العمارة  
لحقها... وقف قبالتها  
"انتى ز علانة منى؟"

"انت شايف ايه؟"  
"ياهاجر علشان خاطرى متزوديش همى"  
"شاركنى همك وهو يخف جمله... طول ما انت شايله  
لوحدك هيفضل تقيل عليك"  
"معلش... متزعلش منى"  
"ماشى... انت هتروح البيت وبعدين تسافر"  
"احتمال ملحقش اروح البيت"  
"للدرجة دى؟؟"  
"يدوب ألق اسافر... هاجر... او عى تقولى لماما حاجة"  
"يعنى هتسافر من غير ما تقولها"  
"هقولها انى مسافر بس مش هقول فىن... مش عايزها  
تقلق على بنتها وهى صاحبة عيا"  
"انت ادرى... حاضر مش هقول حاجة"  
اقترب منها وامسك بيدها وقبل باطن كفها  
"انا بحبك اوى... اشوف وشك بخير"  
انسحب مهرولا فى ثوان معدودة قبل ان تستطع هاجر  
ان تستوعب اضطراب مشاعرها واحساسها بالانقباض

---

وصل وليد منزل اخته... بعدما اتصل بوالدته واخبرها  
انه اضطر لسفر مفاجئ فى مأمورية عاجلة  
ورغم انها المرة الاولى لم تكذبه والدته وصدقته ودعت  
له بالعودة سالما

اقتربت وجيدة من شقيقها وليد وهى تقدم له الشاى

"ماما مجتث معاك ليه...دى واحشانى اوى"  
"ماما متعرفش انى هنا واوعى تقوليلها"  
وبقلق سألته  
"ليه؟"  
"مفيش حاجة بس كانت هتبقى عايزة تيجى معايا وانا  
جاي هنا اقعد كام يوم لوحدى"  
"ولوحدك ليه؟"  
"محتاج اقعد لوحدى ياوجيدة"  
"انت فيه مشكلة بينك وبين ماما"  
"لا ابدأ بس انا قريرت فاتحة من كام يوم"  
وقاطعته  
"بجد...الف مبروك...كده متقوليش"  
"دى قريرة فاتحة بس...لسه لا شبكت ولا لبست دبل  
حتى"  
"كنت هزعل اوى لو كنت عملت حاجة من ورايا"  
"وانا اقدر...هاتى مفتاح البيت علشان عايز اروح  
انام...هو البيت نضيف ولا عايز يتتصف"  
"نضيف زى الفل بروح انصفه دايم"  
"طيب هاتى المفتاح بسرعة لتعبان اوى"  
ذهبت وجيدة لتحضر مفتاح بيت والدتهما  
ارتاح وليد لانه استطاع ان يلهى شقيقته ويغير مجرى  
الحديث بعيدا عن الاسئلة المتلاحقة

ماجد يجلس بانهاك فى مكتب مراد  
 "ايه ياماجد.. مفيش اخبار برضه"  
 "خلاااااااص...ولا واحد من المسجلين... والبصمات  
 اللى موجودة فى الشقة مش متطابقة برضه مع  
 المسجلين"  
 "وبعدين"  
 "وبعدين نفسى يا باشا ارواح انام ٨ ساعات متواصلين"  
 "تنام ٨ ساعات بحالهم وفيه قضية لسه متقفلتش"  
 "انا قلت نفسى بس...يحلم يعنى"  
 "المهم...الست هتيجى بكره تحضر التحقيق ولا تعبت  
 زي كده"  
 "لا متعبتش وقالت هتيجى من الساعة ٩"  
 "طيب كويس... انت تخليها تقعد بره وانت خليك فى  
 مكتبك...لو شافت القاتل اكد عليها متعملش اى رد فعل  
 وتجيلك مكتبك تقولك بس وانت تكلمنى"  
 "حاضر... الا صحيح...على سليمان مفيش اخبار عنه"  
 "كان هيجر علينا مشاكل..كان فيه صحفى وشاف  
 الاسعاف قدام القسم كان هيدخلنا فى موال تعذيب  
 الاقسام والتخريف ده"  
 "وبعدين؟"  
 "قلت له روح معاه المستشفى ولو لقيت تعذيب ابقى  
 انشر"  
 "وراح"  
 "اه ولما اتأكد ان مفيش تعذيب اتصل بيا واعتذر وطلب  
 معلومات عن القضية علشان ينشرها قلت له كام معلومة  
 بسيطة كده وخلص وقال انه هيتابع معانا القضية...

المهم كلمت الدكتور من شوية عرفت ان على جاله  
اغماءة من الالم... علشان من ساعة ما اتحجز وهو  
مبياخدش مخدرات ومع سنه الكبير مستحملش"  
"ياللا نبقى كسبنا فيه ثواب وعالجناه"  
"ياريتها بالسهولة دى... ما علينا.. روح نام يا حضرة  
الظابط وتبقى على مكتبك قبل ٩"  
"تمام يا افندم"

---

على مدى ٣ ايام متواصلة تم التحقيق مع كل من تم  
استدعاؤه للاشتباه به  
كانت منيرة تلتزم بما يقال لها رغم انها بدأت فى اليوم  
قبل الاخير تُجهد من وجودها بالساعات لمجرد النظر  
فى الوجوه  
رغم اجهادها لم تعترض ولم تعتذر عن وجودها  
واكملت مهمتها بصبر

بعد انصراف اخر مشتبه به.. استدعاها مراد  
"انا عارف اننا تعبناكى معانا.. متعرفتيش على اى حد  
من اللى جم؟"  
"لا... ولا واحد منهم"  
"انتى متأكدة؟؟؟"  
"ايوه"  
"يمكن تكونى يومها مركز تيش اوى"

"السلم عندنا بيكون دايما منور اوى وانا كبيرة اه بس  
نظرى كويس الحمدلله...وبعدين اللي نزل كان نازل  
بسرعة وخبطنى لما خبطنى وصرخت رجع بص لى  
فشكله اتحفر ف ذاكرتى"

نظر مراد لماجد

"ماجد... احنا عندنا كام واحد مجوش الاستدعا"

"٤... منهم ٢ اهلهم قالوا انهم مسافرين ومش فى

القاهرة"

مراد"طيب انا عايز الصبح صور ال ٤ دول بأى طريقة

وتروح للمدام البيت يمكن تتعرف على حد فيهم"

ووجه مراد كلامه لمنيرة

"احنا مش هنتعبك اكثر من كده...ماجد هيجيلك بكرة

بالصور...يمكن تكون حل القضية فى واحد من ال ٤

دول"

منيرة"ان شاءالله...هستأذن انا"

مراد"اتفضلى"

---

هاجر على مكتبها...تسمع اخر موكل موجود فى مكتب

زياد وهو يغادر المكتب ويحضر اليها

"لو سمحتى هتبقى موجودة بكرة الصبح؟"

"لا بفتح الساعة ٧"

"يعنى الورق اللي عايز اجيبه للضم للقضية مينفعش

الصبح؟"

"لا حضرتك اى وقت بعد ٧ ان شاءالله"

"خلاص متشكر اوى"

"العفو"

خرج الموكل من المكتب...وظلت هاجر جالسة مكانها  
اجرت اتصالا بدون رد...بعدها حسمت تفكيرها وذهبت  
لمكتب زياد

زياد فى مكتبه يقرأ احدى القضايا...وجد هاجر امامه

"فى حد تانى بره؟"

جلست هاجر امامه وردت بألية

"لا"

"مالك؟"

"ممکن لو تعرف حاجة ومخبياها عليا تقولى الحقيقة

ومش هزعل"

اغلق زياد اوراق القضية التى بين يديه ورد باهتمام

"حاجة زى ايه؟"

"وليد"

"ماله؟؟"

"متغير معايا اوى من يوم ما اتخطبنا...وسافر من ٣ ايام

وتليفونه مقفول ومبيتصلش بيا"

"تصدقى انا فاكر انه اخذ جنب منى علشان كده

مبيجيش"

"وهياخذ جنب منك ليه"

"ما انا كنت ناوى اروح له واسأله"

"يعنى بجد متعرفش حاجة"

"لا والله ما اعرف اى حاجة الا منك دلوقتى"

"تفتكر وليد خطبنى غصب عنه"



ضحك زياد  
"غصب عنه ازاي يا هاجر... انتي مشفتيش حالته لما  
كان باباكي رافض كانت عاملة ازاي"  
"طيب افسر تغييره ده بايه"  
"انتى قلتى مسافر فين؟"  
"بيقول لاخته وقالى مقولش حاجة لمامته خالص"  
صمت زياد متعجبا... هم ان يظهر تعجبه  
ولكنه فضل الصمت حتى يفهم  
"انتى قلتينى... انتى قلتى مسافر وقلتى تليفون مقفول  
من ٣ ايام... ليكون حصل له حاجة"  
"هو كلمنى لما وصل البلد وقال انه راح البيت  
خلاص... كلمنى من تليفون ارضى وقالى متقلاقيش عليا  
لو اتأخرت"  
"وده معناه ايه؟"  
"ما انا لو فاهمة مكنتش جيتلك اسألك"  
"مش عارف اقولك ايه يا هاجر... نستنى لما يرجع  
ونفهم"

---

ماجد يدخل مكتب مراد باندفاع وسعادة  
"مراد باشا... اخير انا انا انا انا انا انا انا انا انا انا انا"  
"ايه يا ماجد؟؟ اعرفت على القاتل؟"  
"اخيرا القضية اتحلت"  
ومد يديه بصورة ولید على مكتب مراد  
"ولید عبد المجید... اعرفت عليه الشاهدة"

"ومستنى ايه ... اقبض عليه فوراً"  
"طبعا... ساعات وهيكون بين ايدينا"  
"تمام ياماجد... خد المفاجأة دى بقى"  
"خير"  
"ابوها مطلعش ابوها"  
"نتيجة ال DNA جت؟"  
"اه... على سليمان مش ابو سناء"  
"نعم!!!!!!"

---

هاجر فى منزلها..جالسة على الغداء مع والديها  
الاب"مالك ياهاجر ...بقالك كام يوم متغيرة"  
الام"شكلها فيه مشكلة مع خطيبها ومش راضية نقول"  
هاجر"ولا مشكلة ولا حاجة ياماما"  
الام"ليه وانا مش عارفاكى"  
الاب"قوليلى ياهاجر فى ايه"  
وحكت هاجر عن قلقها والتغير المفاجئ الذى انتاب وليد  
وشكها انه اضطر لخطوبتها رغما عنه لاسباب تجهلها  
وسفره المفاجئ والكلام المتضارب وقت تلقية الاتصال  
الاب"ماهو انتى مش رمية علشان يعمل كده"  
الام"حاجة غريبة فعلا"  
هاجر"انا بقول اسأل على مامته عادى واسألها ماله"  
الاب بعد تفكير  
"لا انا رأيي تزوروا تزوروا ... وانتى يا ام هاجر  
تحاولى تفهمى منها الحكاية ايه بالظبط..يمكن يكون

اخته عندها مشكلة فعلا ومش عايز يقول بس لما الستات  
بيتكلموا مع بعض بيحكوا ومبيخبوش"  
الام"صح معاك حق...اتصلى بيها يهاجر نعدى عليها  
قبل ماتروحي المكتب"

---

استقبلت ام وليد هاجر ووالدتها بترحاب شديد  
كانت سعادتها بالغة بزيارتهم  
ظلت فترة ليست بقليلة هاجر ووالدتها مترددات فى  
كيفية فتح الموضوع والسؤال عن وليد  
اما والدة وليد بتلقائيتها حلت المشكلة  
"لو كان وليد هنا كان فرح بيكم اوى...ربنا يجيبه  
بالسلامة...مش عارفة مأمورية ايه دى اللى جت فجأة"  
ام هاجر"ربنا يجيبه بالسلامة ان شاءالله"  
صمتت هاجر... لم تستطع ان تحكى ما حدث خوفا ان  
تقلق حماتها على ابنتها

سمعوا ثلاثتهم طرقات عنيفة على الباب  
اسرعت ام وليد بالذهاب لفتح الباب وهى تردد  
"خير يارب...ايوه ايوه حاضر"  
فتحت الباب... وجدت ماجد ومجموعة من العساكر  
ماجد"فين وليد؟"  
تراجعت ام وليد خطوات للخلف...فيما انتفضت هاجر  
ووالدتها من مكانهما والاقتراب من ام وليد التى بدأت  
ترتجف

ام وليد" وليد مين؟؟ ابني"  
ماجد" وليد عبد المجيد مش ساكن هنا؟"  
هاجر" هو مش موجود... انتوا عايزينه ف ايه"  
ماجد" مطلوب القبض عليه في جريمة قتل"  
ام وليد تبكى  
"قتل... قتل ايه انا ابني ميقتلش ابدأ"  
هاجر بلعثة  
"قتل... قتل مين؟؟ يمكن فيه غلط... اكيد فيه غلط"  
ماجد ينظر حوله... ويأمر عساكره  
"فتشوا البيت"

اثناء تفتيش الشقة والبحث عن وليد  
كانت ام وليد تبكى وتنفي بشدة التهمة الموجهة لابنها  
اما والدة هاجر فكانت تحاول ان تهدئها وهي تقنعها انه  
لا بد من خطأ ما  
بينما لاذت هاجر بالصمت وهي تتذكر حال وليد  
وخاصة في اخر مقابلة مما يؤكد فكرة هروبه

تقدمت هاجر خطوات في اتجاه ماجد  
"لو سمحت هو متهم بيايه بالظبط... وانتوا متأكدين ان  
هو مش تشابه اسماء"  
ماجد" انتى اخته؟"  
هاجر" لا خطيبته... بس صدقتى اكيد فيه حاجة  
غلط... اصل مش ممكن... هيقتل مين وليه"

ماجد" هو متهم بجريمة قتل فتاة ليل في شقتها الاحد اللي فات... واكيد مفيش غلط لان الشاهدة الوحيدة اعرفت عليه"

صُعقت هاجر من هول المفاجآت المتتالية  
فتاة ليل... كيف ومتى وما هي علاقته بها؟  
شقتها... ما معنى تواجده في شقة فتاة ليل؟  
الشاهدة اعرفت عليه... اذن لا مجال للخطأ خاصة في ظل هروبه  
لم تستطع التحدث بل ظلت دموعها تنساب على وجنتيها

اما ام وليد السيدة المسكينة بمجرد سماعها كلمات ماجد سقطت مغشيا عليها وهي تصرخ

انهى العساكر تفتيش الشقة... في نفس الوقت الذي بدأ الجيران بالتجمع للسؤال عما حدث ومن بينهم هانى

---

بعد مغادرة الشرطة... اتصل هانى سريعا بوليد  
"وليد... خلى بالك البوليس كان لسه هنا ... اللي كنت خايف منه حصل فعلا وانت متهم بالقتل... اهدا بس هيعرفوا مكانك منين مش انت قافل تليفونك ومبتصلش بحد... بس فيه حاجة تانية... خطيبتك وامها كانوا هنا وحضروا كل حاجة... وانا اعرف منين ايه اللي جابهم... المهم انت استخبي كويس... وليد او عى لو اتمسكت تقول انى كنت اعرف حاجة... انا مش عايز

رجلى تيجى يا صاحبى... لو عايز اى فلوس ولا حاجة  
قولى ابقى ابعتلك بالسوبر جيت... ربنا معاك... سلام"

بعدها انتهى وليد من المكالمة... ظل يدور حول نفسه  
وهو يعتصر رأسه بين يديه محاولا التفكير فيما سيفعل  
جلس على الارض يبكى حظه وقلة حيلته

---

لم تستطع هاجر ووالدتها ان تترك والدة وليد وحدها  
... ظلوا بجوارها حتى افاقت من اغمائها  
كانت تبكى بكاء متصلا لعدم تصديقها ما يحدث  
اما هاجر ووالدتها فالصمت كان رد الفعل الوحيد  
جاءت احدى الجارات واتضح لهما انها الجارة المقربة  
من والدة وليد... عندها اطمئنوا انها لن تظل وحيدة  
واستأذنتا فى الانصراف

عندما وصلت هاجر للشارع لم تستطع ان تتماسك اكثر  
اجهشت بالبكاء ولم تهتم بنظرات المارة  
"بس ياهاجر الناس يتبص علينا"  
"انا كنت حاسة انه مش طبيعى... شفتى ياماما...  
قتل!!!"

"مش عارفة هقول ايه لابوكى... دلوقتى يقول انتوا اللى  
صممتوا ويبهدلنا"

"سمعتى الطباط وهو بيقول فتاة ليل... وفيه حد شافه... يعنى كان يعرف ستات و عامل انه بيحبنى... انا كنت حمارة لما صدقته"  
"الحمدلله انها قراية فاتحة وكانت ع الضيق وهما يدوب اسبوع... يعنى لادخل وخرج ولا تتسمى خطوبة من اساسه... لما امه تفوق من الصدمة هبقى اكلها واقولها اننا فسخنا الخطوبة"  
"الحمدلله اننا عرفناه على حقيقته من بدرى"  
"يعنى اقول لايوكى انك موافقة على فسخ الخطوبة... دى اول حاجة هيقولها لما يعرف"  
"ايوه طبعا موافقة... انا مش ممكن افضل مع واحد خاين زيه... لو مكنش عارف انه عامل عملة مكنش هرب كده"

---

ماجد و مراد فى مكتب الاخير  
مراد "معنى انه اختفى من ٣ ايام يعنى لما راح له الاستدعاء"  
ماجد "بالظبط يا فندم"  
"ويعدين؟؟"  
"متفلقش سعادتك فيه اكثر من كمين فى الاماكن المتوقع انه يكون فيها وخلال ساعات هيكون قدام سعادتك"  
"لما نشوف"  
"وعلى؟"  
"اخلاء سبيل طبعا... بس لما اشوف عايزنى ف ايه؟"  
"عايزك؟"

"اه... طلب يقابلنى وبيقول فيه حاجة مهمة"  
"هتروح له امتى"  
"لما اطمن ان القاتل بقى قدامى"

---

هاجر جالسة فى مكتب زياد تبكى بحرقة  
زياد ينظر لها بأسى  
"هاجر... كفاية عياط احنا لحد دلوقتى مش متأكدين من  
حاجة... فيه كتير قضايا بيكون فيه غلط فى التحريات  
انتى بتسبقي الاحداث ليه؟"  
"اسبق الاحداث ازاي... بيقول انه اتشاف هناك"  
"هو يعنى مفيش حد بيغلط فى التشبيه ويكون حد  
شده... انتى مصدقة ازاي ان وليد يقتل وليه؟"  
"لو مكنش حاله اتغير كده واختفى فجأة كنت لقيت له  
الف عذر انما كل حاجة بتأكد لى ان وليد مش مظلوم"  
"وليد صاحبي وعارفه كويس ومتأكد انه مش ممكن  
يقتل... انا مش عارف ظروف القتل ايه... يمكن قتل  
خطأ... حادثة غير مقصودة... مش عارف يهاجر انتى  
لخبطيني خالص"  
"قتل خطأ ولا قتل عمد هتفرق ف ايه... كده كده كان  
على علاقة بواحدة تانية ومفهمنى انه بيحبني وبيخلص  
لى... انا كنت غيبية وعبیطة والحمدلله ان ربنا كشفه وان  
شاءالله ياخذ جزاؤه"



رن تليفون مكتب زياد... رد  
"الو... ايوه انا... ايه... طيب حالا... سلام"  
نظرات هاجر كلها تساؤل  
زياد يتحاشى النظر لها.... يجمع اشيائه من على المكتب  
"انا نازل... لو حد جه اديله معاد تانى"  
نهضت هاجر وتبعته لخارج المكتب... سألته  
"وليد؟؟؟"  
رد بنبرة حزينة  
"اتقبض عليه"

---

مراد وماجد فى مكتب الاول... وامامهم وليد منهارا  
بالبكاء تارة ومحاولا التماسك تارة اخرى... وفى  
حضور زياد  
مراد"ايه علاقتك بالقتيلة"  
وليد"معرفش حاجة... معرفهاش"  
مراد"ورقم تليفونك اللى على موبايل القتيلة حتى وقت  
موتها"  
وليد"اكيد كان رقم غلط"  
مراد"رقم غلط وبينكم اتصالات صادرة وواردة لمدد  
طويلة؟"  
وليد باكيا"انا مقتلنش حد... والله ما قتلنا ولا اعرف  
حاجة عنها"

مراد لماجد  
"الست منيرة بره؟"  
ماجد "موجودة"  
مراد "هاتها"

كانت نظرات وليد وزياد مركزة على الباب لمعرفة من  
هي منيرة؟  
خرج ماجد لحظات وعاد بمنيرة

بمجرد رؤية وليد لها... وتذكره لحظة هروبه بعد رؤيته  
لجثة ساندى  
تذكر اصطدامه بمنيرة على السلم  
اشاح بنظره عنها فورا... بينما صرخت منيرة عندما  
رأته  
"اهو... هو ده القاتل... ده اللى شفته قتلها"  
صرخ وليد  
"انتى شفتينى قتلتها؟؟؟"  
ردت منيرة  
"ايوه... انت اللى كنت نازل من عندها وبعدها مظهرتش  
غير لما لقيناها مقتولة... انت القاتل"

مراد وماجد وزياد كان ثلاثتهم يتابعون الحديث القصير  
بين ومنيرة ووليد  
مراد وماجد كانت ترتسم على وجههم ابتسامة النصر  
بينما زياد يتابع مشدوها غير مصدق ان صديقه قاتل  
بالفعل

قطع مراد الحديث  
"يعنى هو ده يا مدام؟"  
منيرة "ابوه هو طبعا"  
مراد "متشكرين جدا ... احنا تعبناكى معانا الايام اللى  
فاتت ومش هنقدر ننسى دورك معانا فى حل القضية...  
شكرا جزيلًا"  
ردت منيرة فرحة  
"العفو... ربنا يعينكم... سلامو عليكم"  
خرجت منيرة من المكتب

بعدها نظر مراد مباشرة نظرة حادة لوليد  
"هااا... لسه بتنكر علاقتك بالقتيلة بعد الشاهدة ما  
اتعرفت عليك"  
لم يستطع وليد ان يتحدث من بكائه المتواصل

زياد لمراد "بعد اذن حضرتك انا ممكن اتكلم معاه  
شوية؟"  
مراد وهو يشاور على ركن بالمكتب  
"اتفضلوا"

جلس وليد وزياد فى ركن المكتب  
"وليد... اهدا واحكى لى علشان اقدر اساعدك... انت ايه  
علاقتك بالقتيلة وقتلتها ليه"  
"مقتلتهاش... والله ما قتلتها"  
"ازاى طيب والشاهدة اتعرفت عليك وانت مأكرتش"

"انا هحكياك اللى حصل بالظبط...يمكن تقدر تطلعنى  
منها"  
"احكى... خلىنى اقدر كمان اطمن مامتك اللى مقطعة  
نفسها من الحزن عليك"  
"ماما صحتها عاملة ايه...خلى بالك منها يا زياد...او  
خليها تسافر البلد احسن...قولها بلاش تقعد لوحدها هنا"  
"متقلقتش"  
"هاجر قالت ايه لما عرفت... هانى قالى انها كانت عند  
ماما"  
"هو هانى اتصل ببيك ازاي"  
"حكياك كل حاجة بس قولى الاول هاجر قالت ايه  
عليا... مش مصدقة انى ممكن اقتل صح؟؟"  
صمت زياد ولم يرد...مما اثار قلق وليد  
"فى ايه يا زياد... هاجر قالت ايه؟"  
"هاجر اتصدمت فيك اوى يا وليد... واللى عرفته منها  
انهم فسخوا الخطوبة"  
"ليبيه... بقولك معملتش حاجة والله ما قتلت"  
"اهدا بس ان شاءالله تخرج وتحل المشكلة معاها...ها  
احكى اللى حصل ده ازاي وايه علاقتك بالقتيلة"

---

مراد وماجد فى المكتب... فى ساعات متأخرة من الليل  
ماجد"كده خلاص... اروح انام لى يومين ثلاثة يا باشا؟"  
مراد"انت معندكش اى تعليق خالص"

ماجد" اعلق على ايه؟؟ القضية وخلصت... القاتل  
وهيروح النيابة... انام انا بقى قبل ما يحصل مصيبة  
جديدة"  
مراد"روح نام يا ماجد... بس احساسى ان القضية دى  
لسه متقفلتش"  
ماجد"احساس خاطئ ان شاءالله"  
ضحك مراد وهو يغلق الاوراق المفتوحة امامه  
ويهم مغادرا المكتب  
"روح نام وتعالى بكرة براحتك... انا هعدى على على  
سليمان فى المستشفى الاول وبعدين اجى ع المكتب"

---

اليوم التالى صباحا  
مراد يبحث عن حجرة على سليمان فى المستشفى  
يصل بعد البحث لعنبر به عدد من الرجال  
يقترب من على سليمان  
"صباح الخير يا عم على... ازى صحتك"  
يعتدل على مرحبا  
"صباح النور يا باشا... اتفضل"  
جلس مراد على حافة السرير  
"ايه اخبارك الدكتور قال هتخرج امتى"  
"مش عارف يا باشا... بس ادبنى هنا ارحم من الحجز  
واللى فيه"

"حجز ايه... انت مش ملاحظ ان الحراسة اللي كانت عليك والكلابشات اتفكت... انت خرجت من القضية خلاص... كنت عايزنى ف ايه؟"  
"بجد انا خرجت من القضية... الحمدلله... طيب يبقى اللي كنت عايزك فيه مالوش لزوم"  
"اللى هو ايه اللي كنت عايزنى فيه؟؟"  
"انا افكرت حاجة بخصوص البت اللي اتقتلت"  
"انت كنت تعرفها؟؟"  
"معرفهاش اوى... شفتها كام مرة بس... هي فعلا على اسمي"  
"ازاى؟؟"

"من كام سنة كده مش فاكر قد ايه... يمكن لا يمكن ٨ يجوز ١٠ مش عارف بالطبط كنت بشتغل بواب ف عمارة فى المهندسين... مشونى منها ساعتها مكنتش بلاقى مكان انام فيه ولا معايا فلوس... كنت بشحت وقتها لانى كنت ببقى محتاج فلوس وانا بخاف اسرق او لو يمكن كنت بعرف كنت سرقت... المهم كانوا اصحاب المحلات اللي جنب العمارة اللي كنت فيها عارفينى فكانوا اللي عايزنى اغسله عربية مثلا ولا اجيبه حاجة وكانوا ببيراضونى بزيادة... ف يوم جالى السواق بتاع الست زيزى وقال انها عايزانى ف حاجة مهمة وهندينى منها مبلغ كبير"  
"توانى... مين الست زيزى دى؟"  
"دى عندها محل كوافير حريمى كبير هناك وكنت بشوفها وساعات بتدينى فلوس او تبعت لى أكل"  
"وبعدين... كانت عايزاك ف ايه"

"روحت لها معاه المكتب بتاعها فى المحل... انا اول مرة ادخل هناك يا باشا... لقيت سئات اشكال والوان وبنات كتير بيشتغلوا... قلت بس جايالى شغل ولما لقيت كله سئات استغربت قلت وانا هشتغل ايه وسط السئات دى كلها"

"وبعدين"

"قابلتها... جابت لى اكل وانا باكل قعدت تتكلم معايا شوية عن الناس الغلابة والظروف الصعبة اللى بتمر بالناس وانها ازاي بتحب تساعد الغلابة... استغربت ان واحدة زيها ربنا كارمها كده وحاسة بالغلابة بس قلت ف سرى الناس الطيبة كتير"

"كل ده ايه علاقته بسناء"

"ما انا جاي لسعادتك اهو فى الكلام... لقيتها بتقول ان البنات اللى بيشتغلوا عندها دول اكثرهم غلابة وانها محتاجة لى فى مساعدة بنت غلبانة... ضحكت وقلت لها وانا حيلتى ايه علشان اساعد ده انا محتاج اللى يساعدنى"

"كانت عايزة تجوزك ولا ايه؟"

"لا... قالتلى ان فيه بنت بتشتغل عندها ومالهش اهل واخذتها من الشارع وعطفت عليها والبنات دى مالهش اى اوراق وانها عايزة تطلع لها شهادة ميلاد وبطاقة علشان تقدر تعيش حياتها عادى زى اى حد"

"آآآآه... والمطلوب انك تكتبها على اسمك"

"تمام يا باشا... بس ساعتها انا قتلها انى متجوزتش ولا اعرف اعمل اوراق ولا حاجات من دى... قالت لى ان السواق هو اللى هيكون معايا ويخلص كل حاجة هما

بس محتاجين انى اعمل ابوها علشان لازم شهادة ميلاد  
الاول وبعدين البطاقة"  
"وعملت كده؟"

"انا قافت ف الاول بس لما قالتلى هتدينى ١٠ الاف  
جنيه وانا مكنش معايا ربع جنيه اتلغى اى تفكير ووافقت  
على طول"  
"وظلعتوا الاوراق؟"

"السواق بتاعها كان معايا خطوة بخطوة او انا اللى كنت  
معاها وكان بييمشى كل حاجة سواء بالفلوس او بمعارف  
الست ... انا لا فاكر البنيت كان اسمها ايه ولا حتى فاكر  
شكلها... الحكاية كلها كام يوم واخذت الفلوس وروحت  
اخذت الاوضة اللى انا عايش فيها دلوقتى ونسيت  
خالص الموضوع ده واول ما افكرته طلبت اقابل  
حضرتك"

نهض مراد من جواره... وهو يشكره  
"شكرا يا عم على... وحمدالله على سلامتكم"

---

ماجد جالسا امام مكتب مراد ... يدق على المكتب  
باصابعه فى صمت... بينما ينظر له مراد منتظرا تعليقا

كف ماجد عن دقائقه المتتالية واعتدل فى جلسته راجعا  
للخلف

"وبعدين؟"  
"خلاص...دى كل الحكاية"



"ماشى يعنى... ايه علاقتها بقضيتنا"  
"مش شايف اى علاقة"  
"لا الحقيقة مش شايف"  
"سنا واضع ان وراها اسرار مستخبية"  
"واحنا مالنا... احنا لينا قضيتنا اللى شغالين فيها والقاتل  
لقبناه الحمد لله وشغلنا خلص"  
"فيه حاجة جويا بتقولى ان وليد صادق رغم ان كل  
الادلة ضده بس مش عارف ليه مصدقه"  
"مراد باشا قدوتى واللى بتعلم منه بيعتمد على  
احساس؟؟"  
"متناسش برضه ان ظابط المباحث ليه نظرة... وليد ده  
شكله اخيب من انه يقتل... انا اول ما جيت المكتب  
راجعت الملف تانى... بيان المكالمات مفيش اى علاقة  
بينهم غير قبل الحادثة بيوم واحد... تفنكر ايه الدافع اللى  
هيخليه يقتل واحدة عرفها يوم واحد"  
"يمكن اختلفوا على فلوس... يمكن زى ماقلت خايب  
وهددته بالفضيحة وخاف... يمكن اختلفوا على اى  
حاجة"  
"ماشى... وارد يختلفوا... ساعتها القتل هيجى غضب  
عنه بسكينة المطبخ مثلا او مقص من البيت... او ضرب  
وشد وجذب زى اى خناقة... القتيلة متعرضتش لاي  
اعتداء جسدى... يعنى لو اختلفوا مش معقول واحد من  
اول خلاف هيدبح اللى قدامه... سنا اتقتلت قتل عمد يا  
ماجد"  
"وده معناه؟؟"  
"ان القاتل عنده دافع قوى ورايح متعمد انه يقتلها"

"انا عارف انها قضية متعبة م الاول... طيب ثوانى  
بقى... بصمات وليد الموجودة على جرس الباب"  
"ايه المشكلة انه يكون تواجد فى وقت ومكان الجريمة...  
ده مش معناه انه القاتل"  
"يعنى هتفرج عنه؟"  
"لا طبعا مينفعش... كل الادلة ضده وهو الجانى بالادلة  
وشهادة الشاهدة"  
"لأ مش فاهم... منين سعادتك بتدافع عنه ومنين بتقول  
هو الجانى"  
"دفاعى عنه شكوك... ممكن يكون هو القاتل فعلا  
وممكن يكون لأ... انا بس عايز ادور ورا القتيلة  
واشوف مين عنده دافع انه يقتلها.. ساعتها لو لقينا القاتل  
وليدي يبقى برئ... ملقينا القاتل وكل الادلة ضد وليد  
يبقى احساسى ونظرتى واستنتاجى غلط ومفيش غير  
التسليم بالادلة المنطقية"  
"تمام... المطلوب منى طبعا تحريات عن صاحبة محل  
الكوافير بتاع المهندسين"  
"التحريات هعملها معاك بنفسى"  
"عدم ثقة يا باشا؟؟"  
"لا طبعا يا ماجد... انت ظابط كُفء... انا بس بقى عندى  
فضول ناحية القضية دى"

---

هاجر انتهت ارتداء ملابسها... تُعدل من حجابها وتتنظر  
لنفسها ولعينيها التى ترك البكاء اثرهما عليها

تضع مزيدا من الكحل لعله يضىء عينيها الذابلة  
يطرق والدها الباب طرقات خفيفة  
"هاجر"

"اتفضل يا بابا"

"لبستي؟"

"ايوه"

"انتي هتروحي الشغل؟"

"ان شاءالله"

جلس على حافة السرير

"طيب اقعدى عايز اتكلم معاكى كلمتين"

جلست بجواره...ضمها لصدره

"انا لما قلت عليه لأ زى مايكون كان قلبى حاسس...انتي

اللى صممتى وانا وافقت علشان خاطر ك... دلوقتي يا

هاجر بأكد لك انه مينفعكيش... متعلقيش بواحد مستتى

اعدام ولا مؤبد"

"متقلقش يا بابا انا مش عايزاه خلاص"

"وبتقوليه و انتى ز علانة ليه...يا بنتى ده مجرم

وميتز علش عليه احمدى ربنا انه نجاكى...بدل قتل بيبقى

يقدر يقتل اى حد"

ردت وهى تعود للخلف وتتنظر له

"بابا... وليد مش معقول يقتل...اكيد فيه حاجة غلط"

"يعنى ايه...لسه عايزاه برضه"

"لا... اطمن...قرارى مش هرجع فيه"

"وعاملة ف نفسك كده ليه وبتقوليه و انتى ز علانة عليه

اوى كده ليه"

"انا ز علانة على نفسى اكثر"

هاجر فى المكتب... وحدها تبكى حبها وحببيها الذى  
فقدته

تسمع صوت اقتراب خطوات من الباب المفتوح...  
تمسح دموعها

يدخل زياد... يلاحظها وهى تمسح دموعها  
يقف لحظات بعدما ألقى عليها التحية  
يحاول جاهدا البحث عن كلمات... لا يجد... يكمل طريقه  
لمكتبه

دقائق وتلحقه هاجر... وبخطوات مترددة وقلب حزين  
وصوت مختنق تسأله  
"قابلت وليد؟"  
تجلس فى انتظار رد  
يرد بأسى "ايوه"  
"واخبار القضية ايه؟"

"كويس يا هاجر انك فكرتى تانى... وليد بيقولك انه  
مقتلش... لما قتلته على موضوع فسخ الخطوبة حسيت  
انه هيتجنن... بيقولى انه عايز يقابلك وطبعاً ده مينفعش  
فبيقولى اقولك انه برئ"  
تنساب الدموع على وجنتى هاجر بغزارة... تستجمع  
قدرتها على الحديث  
"انا مش عايزة اقابله ولا بفكر تانى... انا حبيت اطمن  
بس... هو ايه اللى حصل بالظبط وخلاهم يتهموه؟؟؟"

قص زياد على هاجر ما قصه عليه وليد  
نهضت لتغادر وهي تبكى... استوقفها نداء زياد  
"استنى ياهاجر... انا مصدق ان وليد برئ... انا بس  
محتاج اقرا القضية كويس علشان اقدر اساعده وان  
شاءالله هقدر ولو حسيت انى مش هقدر هشوف له  
محامى كبير احسن منى يترافع عنه"  
"ربنا ينجيه"  
"يعنى انتى مصدقاه... هيفرح اوى لما يعرف"  
"مصدقة انه مقتلش... بس ده ميغيرش حاجة... وليد  
خاننى"  
"محصلش حاجة... صدقيني حتى مقابلهاش"  
"الولا انها اتقتلت كان خاننى عادى... انا كنت بموت  
علشانه وبتحدى اهلى وهو رايح يعرف واحدة زى دى  
ولا كأن فيه واحدة مبتفكرش فى حد غيره... انا كنت  
عبيطة اوى انى صدقت ان فيه حب واخلاص... وليد  
اثبت لى ان الاخلص مش موجود فى ايامنا دى"  
لم يستطع زياد... رغم عمله كمحامى... ان يدافع عن  
وليد فى قضية ايسط بكثير من القتل  
الخيانة... جريمة بشعة وان كان لا يعاقب عليها القانون

وصل مراد بسيارته للعنوان الذى وصفه على سليمان  
ترجل من السيارة بصحبة ماجد... ظل كل منهم يبحث  
بعينه عن المكان المقصود  
تقدم ماجد خطوات وسأل عامل بأحد المحلات التجارية  
"فيه فى الشارع هنا كوافير صاحبتة اسمها مدام زيزى"  
شاور العامل على محل بدورين مغطى ويتم به اعمال  
للصيانة  
"بيوتى سنتر مدام زيزى... اللى بيتوضب ده... مش  
عارف ازاي ليها عين تيجى تفتحه تانى"

اقترب مراد مشاركا فى الحديث  
"ليه... هو كان مقفول؟"  
العامل "ايوه... اتقل من ساعة ما اتقبض عليها"  
مراد "اتقبض عليها ليه؟؟ وامتى"  
العامل ينظر له بتشكك  
"ليه حضرتك مين؟"  
رد ماجد بسرعة  
"مب..."  
قاطععه مراد وجذبه من ذراعه  
"شكرا... احنا كنا سامعين انه بيتباع بس خلاص بقى  
مفيش نصيب"  
ذهب مراد فى اتجاه سيارته... وماجد يتبعه  
تتبعهما نظرات متشككة وغير مصدقة من العامل الذى  
سرعان ما اشاح بنظره عنهما قائلا فى سره  
"وانا مالى"

ماجد سأل مراد  
"ليه يا فندم مخلصنا اقول اننا مباحث كان قال كل اللي  
يعرفه"  
"وليه نقول والكلام يوصل اننا بنسأل عليها... خاينا  
نعرف بطريقتنا"  
"يعنى هنكمل فى تحرياتنا سرا؟؟"  
"حسب الموقف يا ماجد لسه مش محدد... يالا بينا"  
"على فين؟"  
"نعرف اتقبض عليها ليه... وبالتفصيل كمان"

---

مراد وماجد فى مكتب بمديرية الامن  
يدخل احد الضباط يحمل ملفا  
"اتفضل يا مراد"  
مراد"متشكر اوى يا عمرو"  
يفتح مراد الملف بلهفة... ويردد بصوت ليسمعه ماجد  
"زينب فوزى عثمان... دعارة... بس شكلها مش غريب  
عليا"  
يقترب ماجد لينظر فى الصورة  
"اه فعلا... وشها مألوف.. هى ليها سوابق قبل كده"  
قاطعهما عمرو شارحا ما بالملف  
"زينب وشها مألوف بالنسبة لكم مش علشان ليها سابقة  
قبل دى... ده لانها سيدة مجتمع من اللي غاويين  
ظهور... عندها البيوتى سنتر وتلاقيها فى الاعمال  
الخيرية...يعنى يوم اليتيم لازم تعمل حفلة كبيرة ف دار

ايتام كل سنة... موائد رحمن فى رمضان... يعنى بتبعد  
عن نفسها الشبهات وفعلا كانت بعيدة تماما عن  
الشبهات"

مراد"ووصلتوا لها ازاي"

عمرو"بلاغ"

مراد"من مجهول؟"

عمرو"لأ... بنت من اللي كانوا عندها هي اللي بلغت...  
ولما عملنا تحرياتنا وراقبنا فيلتها وتليفوناتها قدرنا فعلا  
نعرف انها بتدير شبكة دعارة بتستغل فيها بنات قُصر  
عُشان كده اخدت ٥ سنين"

بيحث مراد فى الملف عن تفاصيل اكثر دقة

يردد ناظرا لماجد

"خرجت من شهرين"

ماجد بيتسم ويكمل

"قولى ان تخمينى صح وان اللي بلغت عنها سناء

سليمان"

مراد"طبعاً تخمينك صح... مش ظابط مباحث شاطر"  
سعد ماجد بشهادة رئيسه وشعر بقليل من الغرور انساه  
جهد الايام الماضية

شرد مراد وهو يقرأ بعض التفاصيل فى ملف القضية  
بينما ماجد يتابعه باهتمام وامهله وقت قصير قبل ان  
يسأله

"ايه التفاصيل"



"سواء كانت بتشتغل عند زينب... حصلت بينهم خناقة كبيرة وطردتها... بلغت سناء عنها وقالت كل الخبايا اللي تعرفها واتمسكت زينب واتحكم عليها"  
"طبعا ه سنين وفضيحة كبيرة يخلوها عايزة تنتقم من اللي كانت السبب"  
"طبعا... بس هي ازاي مخافتش... جابت القوة والجراءة دي منين"  
عمرو "تحرياتنا وقتها قالت ان الخناقة اللي بينهم كانت بسبب راجل"  
مراد مندهشا "سواء وزينب هيتخانقوا على راجل ازاي... فرق السن والمستوى اللي بينهم ميخليش فيه اى مجال ان يكون فيه راجل مشترك بينهم"  
عمرو "النقطة دي مكنتش مهمة فى القضية فمحدث دور وراها"

هم مراد واقفا وهو يصافح عمرو ويتبعه ماجد  
"شكرا يا عمرو... انت ساعدتنا وادتنا خيط مهم ف القضية"  
عمرو "العفو... ربنا يوفقكم"

---

منذ خير القبض على وليد... ووالدته طريحة الفراش  
وجاراتها يتابعن حالتها ويقومن بزيارتها بالتبادل

عندما وصل زياد لزيارتها... ادخلته احدى الجارات  
لحجرتها  
جلس بجوار فراشها وخرجت الجارة  
سألته الام بدموع عينيها  
"طمنى يا زياد... وليد عمل ايه؟"  
"اطمنى ياطنط... وليد معملش حاجة وان شاءالله هيطلع  
براءة"  
"او مال ايه حكاية القتل دى"  
"ورطة وان شاءالله هيطلع منها... اهم حاجة ادعيه كثير  
علشان ربنا ينجيه وادعيلى ربنا يقدرنى واساعده"  
"يارب... انت عالم بحالى"  
"وليد بيقولك متقديش لوحك والاحسن انك تروحي  
البلد"  
"واسيبه؟؟"  
"حضرتك هنا تعبانة ومحتاجة رعاية والاحسن تكونى  
فى البلد مع بنتك واحفادك... وليد قلقان عليكى وهو اللى  
قالى اقولك كده وبالنسبة لوليد اطمنى احنا هنا معاه"  
صمتت الام لحظات تفكر  
"طيب... بس ابقى كلمنى طمنى يا زياد لما تكون معاه...  
علشان خاطرى عايضة اسمع صوته واطمن عليه"  
"حاضر... اول ما اقبله هكلمك"

---

مراد فى سيارته وبجواره ماجد  
"مش كنا استدعيناها يا باشا احسن"

"لا يا ماجد... انا عايز افاجئها"  
"انا حاسس ان حل القضية دى هتكون النهاردة"  
"قول يارب... انا عايزك تعملى تحرياتك عن زينب  
علشان لما اقابلها نطابق كلامها بالتحريات ونشوف"  
"امرك يا باشا"

بعدهما طرق مراد الباب على شقة زيزى... شقة نقلت  
اليها بعد خروجها من السجن  
فتحت الخادمة الباب... سيده فى الخمسينات  
الخادمة"ايوه... اى خدمة"  
مراد"مدام زينب هنا"  
الخادمة"لأ... مين حضرتك"  
مراد"الموضوع مهم... لو سمحتى لو موجودة ياريت  
اقابلها"  
الخادمة"لأ... هي ف مشوار صغير وعلى وصول حالا"  
مراد"يبقى استناها"  
الخادمة"انت مين وتستناها فين"  
مراد"مباحث"  
الخادمة بعد ارتباكها  
"خير... اتفضل"

دخل مراد وأجلسه الخادمة فى الصالون... واستأذنت  
فى الانصراف  
مراد"لأ ثوانى... عايز اسئلك على شوية حاجات... ولا  
تحبى استدعيكى اسئلك فى المكتب"

اقتربت الخادمة بعدما ظهرت عليها علامات الخوف  
التي كان يقصدها مراد بتهديده الضمني  
"نعم يا باشا... انا تحت امرك"  
مراد "انتى هنا من امتى"  
"من شهرين"  
"تعرفى المدام منين؟"  
"اعرفها من زمان... انا كنت بشتغل عندها سنين طويلة"  
"بتشغلى ف ايه بالطبط؟"  
"تقصد ايه؟"  
"يعنى فى البيت بس ولا شغلها التانى كمان"  
"تقصد التهمة الزور اللي اتمسكت فيها... حسبى الله ونعم  
الوكيل ف الظالم... المدام بتاعتنا ست محترمة و عارفة  
ربنا مش زى ما اتقال عليها ابدًا"  
"كنتى تعرفى سناء؟"  
"الواطية مطمرش فيها اللى المدام عملته معاها وراحت  
لافت على الراجل وبلغت عنها"

شعر مراد انه بدأ يمسك طرف خيط جديد... عندما رن  
جرس الباب وقاطعهما  
ذهبت الخادمة مسرعة لتفتح الباب... بدا رجل ضخم  
الجثة... دخل فوراً للشقة ويبدو انه معتاد على ذلك  
وقبل ان يلحظ وجود مراد... سمعه يتحدث للخادمة  
"المدام بتكلم صاحب العمارة وطالعة ورايا... هط  
الفاكهة ف التلاجة"

تقدم خطوات للداخل وعندما لاحظ وجود مراد... مال  
على الخادمة وهو ينظر لمراد وكان من الواضح انه  
يسألها عن شخصية الضيف  
اجابته بهمس... اعطاها ما يحمله وتقدم لمراد  
"اهلا سعادتك...خير؟"  
"مش اعرف انت مين الاول"  
"انا عوض...سواق المدام...اؤمر"  
"جاى اتكلم مع المدام شوية...لو تحب تقعد معنا تنورنا"  
"متأخذنيش يا باشا...تتكلم معاها ف ايه...الست خلصت  
حبسها وخرجت ومفيش اى حاجة غلط تخصها...يبقى  
خير"

نظر له مراد مباشرة وسأله  
"انا جاى اسأل عن سناء سليمان"  
"واحنا مالنا ببنت الكلب دى...اهى غارت ف داهية"  
استطاع مراد ان يتحكم ويمنع ابتسامة الانتصار من  
الظهور وهو يسأله  
"وعرفت منين انها اتقتلت؟"  
ارتبك عوض وتلعثم وهو يردد  
"اتقتلت؟؟!! انا مقلتش اتقتلت ولا اعرف انها اتقتلت"

فى نفس اللحظة التى دخلت فيها زيزى  
عندما رأت مراد وعوض امامه وجهه مكفهر  
"فى ايه...مين ده؟"  
ردت الخادمة  
"اليه مباحث وبيسأل ع اللى ماتتسمى"

زیزی "مین؟؟"

سبقة عوض ورد  
"البیه بیقول ان ساندى اتقتلت"  
جلست معهما زیزی وعلقت وهى تشعل سيجارتها  
وتتظر لعوض ثم مراد  
"واحنا مالنا... احنا منعرفش عنها حاجة من زمان"  
تمالك عوض رباطة جأشه وجلس واخذ سيجارة من  
علبة سجائر زیزی الموضوعه على الطاولة... واشعلها  
ف توتر  
ساد الصمت لحظات فقطعه مراد  
"مدام زینب... انا جاى اسئلك وديا بس واضح ان مفيش  
ای تعاون من ناحيتك... بعنذر ونمشيها رسمى احسن"

نهض مراد مغادرا... عندما سمع صوت زینب  
"لو كنت اعرف حاجة كنت قاتلك"  
التقت لها مبتسما ببرود  
"كله هييان... شكرا"

---

وليد فى محبسه... جالس منزويا فى احد الاركان  
ينظر حوله بهلع من مصيره المنتظر  
"انا ايه اللى عملته ف نفسى ده... ايه اللى خلانى امشى  
ورا شيطانى... ربنا بيعاقبنى... بس انا معملتش

حاجة... يارب انت رحيم وانا معملتش حاجة... يارب  
نجيني وانا مش هعصيك تانى ابدا"  
واستسلم لدموعه التى مسحها بسرعة قبل ان يراه زملاء  
محبسه فيسبوه كما فعلوا فى الايام السابقة

---

فى اليوم التالى تم استدعاء زينب و عوض رسميا  
للتحقيق  
فى البداية دخلت زينب للتحقيق  
وبعد تسجيل البيانات المعتادة...سألها مراد  
"تعرفى سناء من امتى؟"  
"من حوالى ١٠ سنين"  
"عرفتيها ازاي"  
"من الشارع"  
"وهو اى واحدة تلاقىها ف الشارع تاخديها تشغليها  
عندك... ولا اللى فيها مقومات الشغلانة"  
واشتعلت نظرات زينب غضبا  
"شغلانة ايه اللى تقصدها...انا اتحبست ظلم واول ما  
خرجت روحت عملت عمرة انا مش بتاعة كلام من  
ده...وبعدين مش اى واحدة اخدها عندى بس دى صعبت  
عليا بنت وف الشارع وطلبت منى اساعدها مساعدهاش  
ليه؟"  
"وحكاية البطاقة...على سليمان حكي لنا على كل حاجة"  
"يبقى معنديش حاجة اقولها...دى كمان كانت من ضمن  
الجمال اللى عملتها فيها انى خليتها بنى ادمه وليها

بطاقة تقدر مع الوقت تتجوز ولا تشتغل ولا تسافر  
حتى... بدل ما هي كانت من غير اي ورق"  
"اشتغلت عندك ايه؟"  
"للاسف كانت قريبة منى اوى... وكانت عايشة عندى  
فى الفيلا"  
"اشمعنى دى؟"  
"ساندى ذكية وخفيفة وروحها حلوة... بتعرف ازاي  
تخلى اللى قدامها يحبها"  
"بالمناسبة... انتى تعرفى منين ان اسمها ساندى؟؟ مش  
ده اسم الشهرة بتاعها وانتى بتقولى متعرفيش عنها  
حاجة من زمان"  
"ساندى اسمها من بعد ما اشتغلت معايا بفترة قالت لى  
انها متضايقة من اسمها وعايزة اسم حلو يليق عليها... ده  
طبعاً بعد ما اتغيرت وبقت واحدة تانية غير اللى جبتها م  
الشارع"  
"لما العلاقة بينكم كانت قوية كده... ايه اللى حصل"  
"طمعت فيا وخانتنى"  
"ازاي"  
"الانسان اللى كنت بحبه وبيحبنى.... رسمت عليه"  
"رسمت عليه ازاي"  
"رسمت عليه الحب وقدرت توقعه... يضعف قدامها  
وبعدا عملت راسها براسى.. لما عرفت  
واجهتها... لقيتها اتجرات عليا وردت ردود مستفزة  
خلتتى ابهدلها واطردها قدام الناس فى البيوتى سنتر"  
"والشخص ده كان معاكى ولا معاها؟"



"لا طبعا هو يقضى وقت معاها اه...مش اكثر من  
كده...ايه جاب مستواه لمستواها؟"  
"وليه متجوزتوش طالما بتحبوا بعض ومستواكم  
متقارب"  
"ظروف شخصية مالهاش لازمة تتقال بعد السنين دى  
كلها"  
"وبعدين...انتقمت منك انها بلغت عنك"  
"ايوه"  
"مخافتش منك؟"  
"مكنتش بتخاف من حاجة ولا من حد ابدأ"

انهى مراد استجواب زينب... وقام باستجواب عوض  
بعدها  
كل ما حكته زينب كرره عوض مرة اخرى  
سأله مراد عن وجوده وقت الجريمة... اجابه انه كان فى  
منزله وقتها وليس لديه شهود تثبت صدق كلامه

فى اخر اليوم... جاء ماجد بتحرياته  
وبعد ان سرد مراد ماجاء بأقوال كلا من زينب وعوض  
علق ماجد قائلا  
"يعنى اللى قالوه صح... بس فيه حاجات مجابوش  
سيرتها"  
"كملهاالى يا ماجد"

"عوض اتحبس سنة فى قضية الدعارة بتاعة زينب...  
القضية مش كيدية ولا انتقام ولا حاجة لان فيه مراقبة  
لتليفونات ومقابلات وحاجات كتير يعنى زينب بتشتغل

فعلا فى الدعارة و عوض قواد معاها و سناء كانت من  
ضمن البنات اللى بيشغلوهم... الراجل اللى كان على  
علاقة بزینب ده بيقى عاصم المتولى رجل الاعمال"  
ردد مراد قائلا

"عاصم المتولى؟؟؟ بتاع شركات المتولى"

"هو... ويبقى اخو امينة المتولى"

"مرات جمال العشرى"

"مضبوط يا فندم"

"صدفة دى ولا فيه علاقة ليهم بالقضية؟"

"مش عارف بس اللى اعرفه ان عاصم كانت علاقته

قوية بزینب يعنى مش علاقة مزاج وبس واضح انه كان

بيحبها من سنين ومع ذلك مفكروش طول السنين دى

يتجوزوا"

"وبعدين؟"

"سنا اختفت بعد قضية زينب حوالى سنين محدش

يعرف عنها حاجة فيه اللى بيقولوا سافرت وفيه اللى

بيقولوا اتجوزت... وبعدين رجعت ظهرت تانى

ورجعت لشغلها ونشاطها الاولانى"

"مش عارف القرابة اللى ظهرت بين امينة وعاصم دى

حسستنى ان ممكن يكون فيه دافع مشترك انهم يخلصوا

منها وهو الانتقام"

"احنا كده عندنا ناس كتير عندهم دوافع القتل... والقاتل

اللى كل الشواهد ضده معندوش الدافع"

"عوض من اول ماشفته وهو مش مريحنى... وخصوصا

لما وقع بالكلام وارتبك ساعة ما سألته عن قتلها"

"يبقى مفيش غير البصمات هي اللي هتحدد... وبما ان عوض وزينب لهم سوابق... يبقى الصبح بدرى هتكون عند سيادتك نتيجة مضاهاة البصمات"

وبكل الحماس غادر ماجد المكتب... وظل مراد مكانه وهو يفكر  
"لو لقينا بصمات عوض جوه الشقة تبقى القضية انتهت... لو مالوش اى بصمات يبقى اللي فى الحجز ده ضحك علينا وممكن جدا يكون مسح بصماته او لبس جوانتى مش شرط انه مالوش دافع مباشر انه برئ...  
يمكن حد محرضه... لو مش عوض ولا وليد يبقى اكيد القاتل قريب وانا مش شايفه... مفيش قاتل هيكوّن عامل حسابه اوى على كل حاجة... لازم غلطة"

---

فى صباح اليوم التالى  
جلس مراد فى مكتبه متوترا منتظرا نتيجة مضاهاة بصمات زينب و عوض بالبصمات الموجودة فى شقة ساندى  
يتمنى ان تكون النتيجة ايجابية حتى ينتهى من قضيته التى انهكت تفكيره فى الايام الماضية... وكى يطمئن ان احساسه الامنى ببراءة وصدق رواية وليد يُعتمد عليه بجانب الادلة والبراهين

مضت ثلاث ساعات مرت كدهر... عندما وصل ماجد

استشعر مراد النتيجة من ملامح ماجد المتجهمة  
"ايه الاخبار؟"  
"النتيجة سلبية... بصماتهم مش موجودة ف مسرح  
الجريمة"

صمت مراد وهو يفكر ... احساسه الامنى لم يصدقه  
قاطع مراد  
"العمل؟؟"

"خلاص... احنا عملنا اللي علينا ودورنا ف كل خيط  
قدامنا... الواد اللي فى الحبس بيستعيط علينا وكل الادلة  
ضده... هستدعيه واسمع منه تانى... لو ملقيتش اى جديد  
هيتحول بكرة للنيابة"

تم استدعاء وليد للمرة الاخيرة... قص مرة اخرى  
ماحدث معه تفصيلا منذ ان تعرف على ساندى قبل  
الحادث بيوم واحد وحتى لحظة وصوله ورؤيتها  
مذبوحة

ظل مراد يستمع له بتركيز شديد لعله يستطيع ان يجزم  
بصدق وليد من كذبه  
لم يجد مراد جديدا .. فلم يجد سوى القرار الاخير  
الصواب  
تحويل وليد للنيابة  
بمجرد سماع وليد بقرار مراد ظل يردد  
"انا مظلوم... والله ما عملت حاجة... والله ما قتلتها"

اثناء عودة مراد ليلا من العمل... ظل يفكر فى القضية  
وهل انهاها بما يرضى ضميره وتاريخه الجنائى ام انه  
اكتفى بقشور القضية ولم يبحث فى اغوارها  
ظل عقله يعمل طوال الطريق حتى انه سلك طريقه  
بطريقة آلية دون تركيز

وعندما اقترب من منزله... اضاءت عقله فكرة جعلته  
يلف مقود سيارته بسرعة فى عكس اتجاه منزله

---

لم يحدد مراد عما يبحث فى شقة ساندى  
ظل يبحث باهتمام فى كل شبر من الشقة الواسعة  
جلس يلتقط انفاسه بعد البحث الطويل فى حجرة النوم  
الرئيسية والتي كانت اخر مكان بحث فيه  
توجه للدولاب الذى بحث فيه منذ قليل وتركه مفتوحا  
رأى طرف ظرف تحت الملابس... سحبه بهدوء  
فتح الظرف وجد عدد قليل من الصور  
صورة لرجل بجلباب وطفلين بنت وولد خلفهما اثر  
سياحى يجهله  
صورة اخرى لنفس الرجل يبدو اصغر قليلا من  
الصورة السابقة يقبل طفله  
صورة شخصية لنفس الرجل وصورة شخصية لامرأة  
صورة زفاف للرجل والمرأة اصحاب الصور الشخصية  
امسك مراد الصورة الاولى ودقق فيها

الطفلة يبدو عمرها ما بين ١٠ و ١٢ سنة و الاخر يبدو  
اكبر منها قليلا  
دقق مراد فى ملامح الطفلة وجدها تشبه ساندى كثيرا  
نظر خلف الصورة وجد مكتوب بخط طفولى  
(معد ابيدوس انا ومحمد وبابا ١٩١١\٩٧)

---

ترك ماجد ظرف الصور على مكتب مراد وهو يسأله  
"يعنى الصور دى هتفيد قضيتنا بايه؟ وايه علاقتها انك  
أجلت عرض المتهم على النيابة"  
"دى سناء"  
"ايوه ماهو باين من شكلها...ايه المشكلة"  
"سناء مش بنت شوارع...لها اهل اهو اب وام واخ...يا  
تاقت منهم او انها هربت لاي سبب"  
"يعنى هما سايبينها كل ده وهنىجى نقولهم ان بنتهم  
ماتت"  
"او ممكن يكونوا عرفوا طريقها الايام دى واهلها هما  
اللى قتلوها"  
"وهوصل لاهلها ازاي...احنا اصلا منعرفش اسمها  
الحقيقى ايه"  
"من لبس الاب والام باين انهم صعايدة او فلاحين...  
نشوف كل بلاغات الغياب فى كل محافظات الفلاحين  
والصعيد من بعد ٩٧ لحد ٢٠٠٢ من ١٠ سنين لما  
قابلت زيزى"  
"بلاغات الغياب فين بالظبط"

"كل المحافظات"  
"ولنفترض انها هربت منهم وان اهلها صعيدة... تفتكر  
هيبلغوا عن غيابها؟"  
"والله احنا ماشيين بالخطوات المنطقية واحدة واحدة...  
لقينا اى بلاغ غياب ليها خير ملقيناش هنوصل برضه  
لاهلها"  
"عندك طريقة؟"  
"عندى"

---

وبالفعل فى الايام التالية كان التركيز كله من مراد  
وماجد وبعض مساعديهم هو البحث فى جميع بلاغات  
الغياب بمحافظات مصر جميعها على مدى ١٠ سنوات

وبعد عناء وجهد ايام... هتف احد المساعدين

"لقيتها يا باشا... بلاغ غياب"

تقدم بملف الى مراد.. اقترب ماجد منه ليرى تفاصيل  
الملف

فتحه مراد وجد صورة ساندى فى عمر اكبر قليلا من

الصورة التى وجدها فى منزلها... شرع فى قراءة

البيانات

"فاطمة يسرى عبيد من قرية عنييس مركز جهينة

سوهاج متغيبه من ٢٠ ابريل ٢٠٠٢ عمرها ١٦ سنة ...

المبلغ عن غيابها زوجها حسن ياسين عبيد "

التقت نظرات مراد وماجد فى تساؤل وتعجب

ورردا معاً  
"المُبلغ جوزها؟؟!!!"  
لحظات من الصمت سادت بينهما لاستيعاب المفاجئة  
التي لم تخطر لهما على بال قط  
بدأ مراد بالكلام  
"لازم نروح نستجوب جوزها ده ونشوف ايه حكايته"

---

فى دوار عمدة القرية... ذهب مراد وماجد وأمور  
المركز لمعرفة معلومات عن ساندى او فاطمة قبل ان  
تصبح ساندى

جاء احد الخفراء لتقديم الشاى حتى يصل العمدة  
بعدها بدقائق وصل عمدة القرية واستقبلهم بترحاب  
المأمور "بقولك ايه يا عمدة... الباشاوات جايبين من مصر  
وعايزينك فى خدمة... عايزين يعرفوا كام حاجة كده بس  
تجيلهم دوغرى ف الكلام"  
العمدة "تحت امر الباشاوات"  
مراد "احنا عايزين نعرف معلومات عن اصحاب  
الصورة دى يا عمدة"  
مد مراد يده بصورة فاطمة وشقيقها ووالدها  
دقق العمدة النظر فى الصورة  
"ده يسرى والبت فاطنة بنته الله يرحمهم والواد محمد  
وهو صغير"  
مراد "هما ماتوا... فاطمة ماتت امتى؟"



العمدة" كانوا بياخذوا عزاها من يبجي اسبوعين ولا ١٠  
ايام كده... البت جابت العار للعيلة كلها... ابوها وامها  
كانوا نسمة الله يرحمهم مش عارف دى طلعت لمين"  
ماجد"يا عمدة انت بتحكى كأننا عارفين حاجة... واحدة  
واحدة واحكى الحكاية من الاول"  
العمدة"متأخذنيش ياباشا... عايز تعرف ايه بالظبط "  
مراد"كل حاجة.... فاطمة اختفت امتي وليه وازاي؟  
وهي كانت متجوزة فعلا؟ ليها عيال؟؟فين اهلها  
دلوقتي"

العمدة"فاطمة ومحمد دول الخلفة اللي فضلت من عيال  
يسرى عبيد... يسرى مات وبعدها بسنة مراته ماتت...  
وبقى محمد وفاطمة لوحدهم... الواد محمد سافر  
اسكندرية يشتغل في المينا وياسين اخد فاطمة عنده...  
بس ياسين عنده شباب وميصحش يقعد عنده بنت وسط  
الشباب... قام قالوا ياخذوها لابنه حسن... بس كانت البت  
بتاعة ١٥ سنة الا شوية... عملوها شهادة وسنوها  
وكتبوا كتابها على حسن وقيل ما يدخلوا كانت مع عمها  
ومرات عمها في المركز ضاعت منهم ولا هربت الله  
اعلم المهم انهم قعدوا يدوروا عليها كتير لحد ما زهقوا  
وكل البلد كانت بتتكلم عن انها هربت لانها كانت دايرة  
على طوب الارض في البلد تقولهم انها مش عايزة  
تتجوز حسن... ومحمد من عاره سافر وساب مصر كلها  
ومرجعش غير قريب وقالوا انهم عرفوا طريقها وانها  
ماتت وعملوا عزا"  
ماجد"مقالوش ماتت ازاي"

العمدة بتوجس وادراك ان كلامه سيؤدى بأبناء بلده  
لمصير سيء... حاول ان ينتقى كلامه لانه يدرك تماما ان  
اهل المدن لا يعلموا احساس اهل الصعيد بالعار الذى  
يلتحق ببناتهم عند غيابهن وانه لا بد من الثأر للشرف  
مهما كانت العواقب

اجاب باقتضاب

"مقالوش اكثر من انها ماتت"

ماجد"ومحدث سألهم؟"

اهل القرية جميعا علموا بأن حسن ومحمد ابن عمه ثأرا  
لشرف عائلتهم بعدما انتشرت الاخبار فى البلد منذ فترة  
بأن فاطمة بنت عبيد (ماشية فى البطال) على حد قول  
اهل القرية بعدما تعرف عليها احد شباب القرية من  
خلال الانترنت واخبر زوجها الذى ارسل فوراً لابن  
عمه بما وصل له من معلومات فأتى من سفره مسرعاً  
لتحرى الأمر

لم يستطع العمدة ان يجيب صدقا حتى لا يثبت التهمة  
على ابناء قريته اذ ربما وجدا ما يبرئ ساحتها امام  
الجهات المسؤولة والتي لاتقدر قيمة الشرف لدى الرجل  
الصعيدى

تقدم مراد بالشكر لعمدة القرية فى مساعدته لهما  
وغادر الدوار مع ماجد

بعد إلقاء القبض على حسن ومحمد وترحيلهما للقاهرة  
كان مراد منتظرا بشغف نتيجة مضاهاة بصماتهما  
بالبصمات الموجودة في مسرح الجريمة  
جاءه ماجد فرحا وهو يهلل  
"اخيرا يا باشا... بصمات الاتنين موجودة في مسرح  
الجريمة ودافع الجريمة وشهادة اهل البلد انهم عملوا  
عزا اليومين اللي فاتوا دول بعد ١٠ سنين غياب لبتنهم  
يبقى كده القضية اتفقلت"  
رد مراد مزهوا بنفسه انه سار في الطريق الصحيح  
لتحقيق العدالة وعدم الاكتفاء بأدلة تزج ببرئ خلف  
القضبان او ربما تحت حبل المشنقة  
"كده يبقى مش باقى الا اعترافهم وضميرى يستريح  
ناحية القضية دى"

---

اثناء التحقيق مع حسن ومحمد معا... لم يستطيعا الانكار  
بعد مواجهتهما بكل ما ضدهم من أدلة... وبدءا سرد  
اعترافاتهما  
حسن "دى بنت عمى ومراتى يعنى شرفى اللي مرطته  
فى الوحل وكان طبيعى انى لما اعرف انها ماشية فى  
البطال انتقم لشرفى"  
مراد "بعد ١٠ سنين؟؟"  
حسن "لو كنت عرفت لها طريق قبل كده مكنتش  
استنيت"  
مراد موجهها حديثه لمحمد

"وانت؟؟ جيت من سفرك علشان تقتلها؟"  
محمد"ايوه... من بعد ما هربت وهى خلتنا مش قادرين  
نرفع عيننا فى الناس...اول ما حسن كلمنى وقالى اللى  
بيتقال من جدعان البلد نزلت على طول"  
مراد "وعرفتوا طريقها ازاي...عنوانها يعنى؟"  
حسن"واحد من معارفنا بقى يكلمها واتعرف عليها  
وطلب يقابلها...وبعد ما عرفنا عنوانها نزلنا مصر  
روحنا راقبنا الشقة واتأكدنا انها هى واستغلينا وقت  
هادى مكنش البواب موجود وجارتها اللى فى نفس  
الدور نزلت...طلعنا وخبطنا عليها وفتحت لنا"  
مراد"وافتحت لكم الباب عادى كده؟"  
محمد"كنا مداريين نفسنا بعيد عن العين وبابن عليها  
كانت مستتية حد لانها فتحت بسرعة"  
مراد"احكولى عملتوا ايه بالطبط"  
محمد"اول ما شافتنا كانت هتقل الباب تانى... زقينا  
الباب ودخلنا وقلنا ورانا...جريت وهى بتهددنا انها  
هتبلغ... دخلت لحد جوه تجيب التليفون... كنا بقينا  
وراها... انا كنت عايز اقتلها بايدى"  
حسن"دى مراتى انا... وهربت منى انا... محمد كتفها  
وانا اللى دبحتها وغسلت عارى بدمها"

بعد سماع اعترافاتهما... قرر مراد تحويلهما للنيابة  
لاستكمال التحقيق... واخلاء سبيل وليد

فور خروج وليد من محبسه... خرج مسرعا للشارع  
ليتنفس حريرته التي سُلبت منه الايام الماضية  
كان كل شئ حوله له طعم مختلف... زحام الشوارع  
وعوادم السيارات التي كثيرا ما اختنق منها اصبحت  
بالنسبة له كالنسيم العليل في لحظات ظهيرة شديدة  
الحرارة  
بعيدا عن محبسه والمستقبل المظلم الذي كان ينتظره  
...شعر انه ولد من جديد  
ولكى تكتمل سعادته... كان لا بد ان يذهب لهاجر ليستعيد  
حبه وتكتمل سعادته في الحياة

بعد اقل من ساعة... كان يطرق باب منزلها  
الاحلام بالمستقبل السعيد تتراقص امام عينيه  
فُتح الباب... وجد والد هاجر امامه  
مد يديه مصافحا  
"ازيك يا عمى... وازى هاجر وطنط... انا خرجت من  
ساعة بس... فين هاجر افرحها"  
رد والد هاجر دون ان يصافحه  
"وانت عايز ايه من هاجر... احنا بلغنا والدتك بفسخ  
الخطوبة"  
بدأت الاحلام التي رسمها في خياله تنهار فجأة وتظلم  
الدنيا امام عينيه  
قال مستدركا  
"انا برى يا عمى... لو مكنتش برى مكنوش خرجونى"  
"برى او برى ميهمناش... انا مش هربط حياة بنتى  
ومستقبلها بواحد اخلاقه زى اخلاقك وميعرفش ربنا"

"بس انا... انا بحبها وعايذ اعتذر لها"

سمع صوت هاجر من خلف والدها  
"معنديش حاجة تانية اقولها لك يا وليد اكثر من اللي بابا  
قاله... لو سمحت متجيش هنا تانى"  
وليد اغرورقت عيناه بالدموع واختنق صوته  
"سامحيني يا هاجر واديني فرصة"  
"كان ممكن اسامحك فى اى حاجة الا خيانتك ليا... بعد  
اذنك... يالا يابابا"  
تقدمت هاجر والدها وهى تغلق الباب فى وجه وليد

هبط وليد الدرج منكسرا يجر اذيال الخيبة يذرف دموع  
الندم على ضعفه امام لحظات سعادة عابرة كانت  
السبب فى ضياع حبه وقتل احلامه وسعادته الابدية كما  
كادت ان تودى بحياته ظلما.

تمت

ليلا حمرا

دينا عماد

ليلا حمرا

دينا عماد